

皇  
清  
奏  
議

皇清奏議卷六十五

籌辦東省錢糧虧累疏 乾隆四十八年陸 曜

署理山東布政使臣陸曜跪 奏為敬陳管見事竊臣仰  
沐 聖恩畀以藩司重任受 命以來將及兩月伏  
念前此東省本無虧累何以近今數年頗積如許之多推  
求其故約有數端一徵收錢糧例有火耗除各州縣養廉  
及留支各款外例應隨正解司但未定有未完處分各州  
縣正將正銀起解而耗羨一項延至四五年未清前任未  
完交於後任積之既久為數漸多應請嗣後嚴定處分務  
與地丁正項隨同報解若有未完照正銀之例並予降罰  
如此儘收儘解更無餘銀存剩恐其挪用則宿弊可除矣  
一存倉穀石每遇市價稍昂詳請平價出糶所收價銀最  
易侵挪向飭提貯府庫亦仍不免抹同掩飾臣深知其弊

當於到任之初檄飭提解司庫以驗虛實延今兩月果有虛報彌補而實未存貯者除已嚴勒完解外應請嗣後凡有難存穀價俱令寄存司庫至應行買補之時即將原銀發還由該管府州出具實在買穀存倉甘結送司查核如此則倉糧穀價俱得實在矣一各州縣銜歷年民欠未完糧銀恐有以完作欠冀圖挪掩者現在另行籌辦徹底清查而實欠在民者亦復不少更有彼縣民人置買此縣地畝者名為寄莊其糧銀類多延欠雖屢經立法查辦無如自恃隔屬頑抗不前如欲按名拘比又恐花戶衆多勢難越境滋擾揆厥所由總因官處鄰封民不十分畏懼以致經征之州縣無法可施往往為其壅解自數百兩至千餘兩不等此亦州縣官虧挪之一端應請嗣後凡寄莊花戶每年開征之始令經征州縣逐一查明開造村莊戶名錢

糧數目清冊移交住居之州縣代行催征如至奏銷未完  
即將代征之員開叅議處似此籌辦則接壤州縣彼此皆  
有代征寄莊錢糧之責自必各顧考成實力催征糧戶亦  
畏懼本管官吏不敢懸宕致有賠累墊解並可清釐此等  
積欠於挪墊虧累之弊亦得藉以杜絕矣臣蒙 皇上  
高天厚地之恩委以錢糧總匯之司竊謂從前之虧缺固  
宜彌滿而以後之防範尤當周密與其催提過急致啟多  
方挪掩冀免一時罪戾不若嚴絕弊端使其無所隱藏於  
倉庫可收實效也

壽汶水蓄洩疏乾隆四十八年

何裕城

署理河東河道總督臣何裕城跪 奏為請於戴村壩迤  
上酌建閘座以資蓄洩事竊查東省汶河為諸泉之歸宿  
全運之來源自前明於戴村築壩截汶入運復由南旺分

水口之兩岸斗門收入蜀山馬蹠二湖諸蓄源源助濟在運河水弱之時所賴惟重汶流水旺之年諸泉坡水同時並漲挾泥帶沙性最湍急由分水口奔注入運泥沙沉聚南旺一帶積淤極厚緣戴村壩高於汶河五尺汶水大發雖可漫壩洩入大清河但祇能洩泛漲之水而不能減重濁之砂故張伯行所著居濟一得云戴村壩止可洩水不能通沙當於該壩建閘以便蓄洩明宋禮築壩而不能建閘乃未竟之功也且當盛漲之際汶水或一日長至一丈餘尺一線運河不能容納諸湖又積水過大勢必有潰堤之溢之虞乾隆四十五年秋開汶河驟漲致戴村民堰漫溢由大清河歸海經前撫臣奏明堵合完竣四十六年秋開濟寧以南水勢甚大恐汶流倒漾為患因將舊築堰口開放宣洩至冬令復即堵築上年伏秋時亦照此辦理嗣

以南旺然壩後汶水旺盛恐各湖收蓄太多復經臣奏請  
將民堰開挖現在二月初即屆消水之期應於南旺開壩  
前照舊堵閉年來頗得淺漲之益而屢開屢築既費人工  
且在應開應築之時動輒蓄淺總要集夫興辦未免需時  
亦恐緩不濟急似應於該處相度情形設法籌辦以期一  
勞永逸臣率同道廳等逐細講求咸以戴村壩身綿長一  
百二十六丈八尺歷次興修成功匪易未可輕易更張莫  
如在壩旁另行擇地建立閘座俾資蓄淺既得免驟漲漫  
堤之患又可省開堰堵築之勞臣於查催挑工之役復於  
戴村壩上下察看惟迤上舊閘民堰處所上承汶水地當  
坐灣連年於該處開堰淺水高下形勢已極通順而堰口  
以外皆係山根並無民間田舍第須將原有河形畧加開  
展即可堵注大清河毫無阻礙今擬即於該堰口建閘三

座閘底與汶河底相平設板啟閉水小則將閘板堅閉收束入運水大則亟行啟板暢洩歸海不但因地制宜足以保衛堤岸而相機妥辦行之經久伏秋盛漲沙隨水去南旺一帶運河即可漸免淤墊且本年大汛內正值運河估辦堤工之際汶河漲水即於閘口減消將來堤岸告成永資蓄洩預防汶流之泛漲疏通河底之淤沙實於利運便民而有裨益臣再三籌度委係急應興辦之工除將需用工料銀數確切估勘另行具奏外所有擬於戴村壩迤上酌建閘座緣由理合繕摺奏聞

議添駐弁兵疏乾隆四十九年

福康安

協辦大學士陝甘總督臣福康安謹奏為酌添營汛分駐官兵兵丁於陝甘兩省各標營裁移抽撥以裨地方以節經費事竊臣前會同大學士公阿桂具奏酌籌善後

事宜因甘省幅輳遼廓地廣人稀自涇州至省一千餘里道路綿遠汛少兵單擬於安定會寧適中之馬營監添設一營六盤山險要之處安設一汛俾控制彈壓此外通衢大路及險僻小徑俱多添墩堡令聲勢聯絡呼應可通於邊疆重地實為有裨如蒙 俞允再行詳悉確查將應

添營汛兵數分晰妥議具奏奉

硃批該部知道欽此

臣查甘省原額設兵五萬六千六百餘名陝省原額設兵三萬四千五百九十餘名除節次裁撥移駐新疆屯防眷兵及扣留公糧公費養廉不補外通計陝甘二省止存兵五萬五千九百餘名較原額少兵三萬五千二百餘名乾隆四十六年欽奉 諭旨以邊陲重地捍衛宜嚴特令酌籌添補共添實兵一萬二千七百餘名合之舊存兵額約有七萬列鎮分營兵力不為不厚惟是前此酌添兵數



其重在於督撫提鎮各標今各添足兵數千以資鎮守而供調遣次則緊要營堡添兵自數百名至數十名不等以扼要隘而重稽查至州縣之防禦墩戍之稀疎本未議及臣到省後詳加體訪甘省河西各屬原設營堡墩汛尚為嚴密惟自蘭州迤東至涇州一千餘里道路綿長北控邊城南通隴蜀兼以崇山峻嶺重複盤迴外則番族環居內則民回雜處大路各府州縣原設防兵無幾墩戍寥寥不足以資防衛今擬於平涼府等處添兵自一百數十名至十名不等則平時既可備差操有事足供守禦又於地方空闊處酌添墩堡數十座撥兵分駐俾聲息相通並常令其會哨周巡則奸宄不至於潛藏而匪徒亦易於緝獲查平涼府原設兵五百名除分防外存城兵止三百六十三名該處地池較大為甘肅門戶今擬添兵一百五十名以

足六百五十名經制外委一名額外外委三名六盤山要隘處所添一營汛設千總一員經制外委一名額外外委一名兵一百名以資防範而附近之底店潘隴山等處均可稽查彈壓靜寧州原設兵三十五名今擬添兵一百十五名以足一百五十名經制外委一名額外外委一名隆德縣原設兵四十名除分防外有城僅十六名今擬添兵二十四名額外外委一名並於通衢大路舊有汛戍空濶處添安墩堡三十九座務俾聲勢聯絡又通渭所屬之馬營監為舊時縣城民居稠密南達通渭伏羌北連會寧安定乃適中之地擬於該處酌添一營設遊擊一員守備一員把總二員經制外委三名額外外委四名兵五百名酌定存營兵三百名以資控制彈壓其餘二百名在於四處扼要之墩堡四十座而附近之石峯堡馬家堡官川等處

均可巡查稽察庶奸宄不致於潛藏又通渭等縣原設額兵太少不但有事不足以資捍禦即平時亦不敢往來護解遣犯及遞送公文之用今擬於原設額兵之外清水縣添兵十名通渭寧遠伏羌漳縣各添兵十五名禮縣西和秦安兩當各添兵二十名均足三十名之數以資差遣莊浪地方係縣丞分駐添兵三十名三角城等處添兵四十名又自固原至靖遠四百餘里地方遼闊回民雜處靖遠至省三百餘里高山環繞徑路縈紆舊有墩戍甚屬寥寥聲勢不能聯絡今擬添兵二百二十名分安墩堡四十四處星羅棋布庶可以壯聲勢而重巡防臣通計此次添設營汛共需官弁二十三員內遊擊一員守備一員千總一員把總三員經制外委六名額外外委十一名兵丁一千三百四十名額外外委即在各省各兵數內核計每年應需額

餉三萬四千餘兩仰惟 皇上軫念邊防自不惜斤斤小費第 國家經費有常亦不可不通盤籌酌查陝甘下馬關一營祇設兵二百二十餘名即有遊擊一員於營制未洽該處第有守備一員足資統轄應將遊擊裁移馬營監分防管領此外於西安軍標撥守備一員千總一員把總二員經制外委三名固原提標撥把總一員經制外委二名寧夏鎮標撥經制外委一名足敷分駐所需兵丁一千三百四十名於督撫提鎮各標及各協營內擇其不近邊關又非大路並無番回錯處無甚緊要兵額較多之處將零星尾數裁移抽撥已敷應用如此通融辦理則應設營汛墩堡地方可以照數增添防守即益森嚴而各營抽掣兵丁無幾亦不至兵力單弱庶帑不虛糜兵歸實用矣

再籌添兵事宜疏 乾隆四十九年

福康安

協辦大學士陝甘總督臣福康安謹 奏為遵 旨再

行籌議添兵事宜仰祈 聖鑒事竊臣議 奏甘省酌

添營汛分設官兵一案欽奉 上諭令臣通盤籌畫仰

見我 皇上厯念巖疆營制務祈益壯聲威為億萬載

牧寧之計臣欽遵 訓示惟在因地制宜俾添一兵即

收一兵之實用庶勁旅星羅疆圉更資捍衛伏查甘省係

西陲要地所設兩提五鎮額兵較他省為多向來重兵所

聚大半在河西不但提督總兵副將駐劄之處兵數充餘

即在各州縣均有兵數百名至百名不等已敷防守無須

再議增添其河東地方惟固原因沿邊要地上屆添兵案

內議將西安提督移駐添設五營加以城守一營統計額

兵三千有餘已成重鎮至河州控扼番回尤關緊要雖改

協鎮而親標止有兩營額兵不及二千似猶單弱其自蘭

州以東直至涇州千里而遙均居腹地不免汎少兵單又  
省城東北自靖遠鹽茶以至固原所屬之黑城數百里之  
內以及省城東南鞏昌秦州所屬一帶亦因地異衝途稍  
為輿僻是以設兵較少亦且墩戍稀疏臣前於善後事宜  
業內議請於馬營監添設一營六盤山添安一汛復於平  
涼隆德靜寧莊浪等處添設防兵並於蘭州至涇州大路  
暨從固原靖遠鹽茶迤至省城各處緊要墩汛計需官弁  
二十三員兵一千三百四十名即在陝甘各標營內酌量  
抽撥官則於簡僻營分裁移兵則於兵多營分畸零數內  
裁改在新添之處既可資防守而壯聲威而在抽撥之營  
不過裁兵數名至十數名不等於通屬並無妨礙乃蒙

聖主軫念邊防有加無已令於裁移抽撥之外准再添  
三千名自當仰體

慈懷妥協籌議臣查河州原設二

營尚未足以壯聲勢今擬增設城守一營添都司一員千總二員把總外委各四員兵四百名共新舊兵二千三百二十名均勻分派三營自可無虞單弱至通渭隆德前議添設之兵計存城不過三四十名誠如 聖諭該處地方遼闊不敷巡防今擬於隆德縣添足兵一百五十名通渭縣添足兵一百名又靜寧州一處係在蘭州涇州適中扼要之地西接會寧東連隆德南控通渭之馬營監石峯堡地方北與秦鹽境接壤四達之區實為緊要今擬設立副將於前議設兵一百五十名之外添設三百五十名共五百名並添設左右二軍左軍駐隆德右軍駐會寧以成犄角之勢至靜寧所添副將查有慶陽協原設副將一員當設協之初係相沿舊制因慶陽在北路沿邊是以駐劄大員俾資彈壓今中外一家北邊蒙古均係 聖朝臣

僕且慶陽西接寧夏東接延榆均有總兵駐劄聲息相通似可無須副將營制擬即令該副將帶同中軍都司移駐靜寧以省添設仍於慶陽改設叅將一員中軍守備一員管領原有弁兵以符營制又涇州為入甘門戶秦州係南路扼要之區今擬於涇州添設都司酌增弁目並添兵八十五名合之舊設兵一百零五名共二百名秦州再添兵一百七十九名合之舊兵二百二十一名共存城兵四百名其該州所屬之秦安縣舊有兵三十名今擬添兵七十一名共一百名並添設千總管領巡防又馬營監底店石峯堡均屬要地前於馬營監議設兵五百名足敷防守今擬於石峯堡安設一汛撥安弁目添駐兵一百名再於底店議設弁目安兵一百名立營分汛以資彈壓地方聯絡聲勢又安定舊有把總一員兵一百名今擬再添兵五十名



共足一百五十名即於此內撥安墩汛其會靈舊有把總一員所管兵止三十名今亦擬添足一百五十名其他如金縣伏羌西和靈遠漳縣莊浪華亭靈臺鎮原崇信徽縣成縣禮縣清水兩當等十五處舊有之兵多不過五十名少者二三十名至十五名十名不等均屬短少今議於伏羌金縣莊浪各添足兵一百名其餘各縣均添兵五十名再如瓦亭驛馬家堡黑城白水鎮安國鎮李旺堡孟家墩唐家川等處或在大道衝途或係僻路要隘今擬酌添及新設兵自五十名至一百五十名並酌添弁目管領因地制宜均資彈壓再臣前議添兵一千三百四十名即將陝甘各營兵丁零數抽撥此內有河州秦州鞏昌階州洮州岷州文縣成縣等營抽撥兵一百二十名茲蒙 皇上於抽撥之外賞添三十名兵數儘屬寬餘臣復查河州等

處均屬緊要之地且現在秦州河州暨鞏昌所屬地方內  
即有議添之兵似未便於前項各營內抽裁擬請仍還原  
數停止抽撥其所缺兵丁即在新添兵內撥補計此案添  
官弁五十九員除裁移副將一員千總一員外實添設叅  
將一員都司二員守備三員千總十一員把總十一員經  
制外委二十八名其額外外委即在兵數之內又統計前  
議抽撥此次加添兵數共有四千二百三十餘名得此數  
千勁旅增入額兵較少之各營縣則自省城東路以至涇  
州北路靖遠鹽茶以達固原暨南路河鞏秦階一帶營伍  
充實墩戍聯絡計通省河東河西地方處處有兵星羅棋  
布藉資捍衛邊陲可保金湯永固矣

議新疆屯田疏 乾隆四十九年

福康安

協辦大學士陝甘總督臣福康安謹 奏為陳明口外屯

田實在情形仰祈

聖鑒事竊臣受

恩深重畀任

封圻不但陝甘二省責成攸繫事事當殫竭愚忱實力辦理即新疆地方有須整頓調劑之處亦不敢稍存膜視凡屬見聞所及即應據實 奏明恭候 皇上訓示伏查

新疆底定以來仰荷

聖主天威拓地二萬餘里規模

式廓民俗恬熙實與內地無殊經畫甚為盡善惟屯田一事原係 聖主厯念邊儲於兵丁操防之暇授地課耕

勤力作以收地利既備兵精兼充倉貯實為邊防善政自當妥協奉行計垂久遠乃臣蒞任後留心訪察口外事件聞各處屯田因頻年分數加增致兵力頗形竭蹶但事出傳聞殊難憑信適於七月間新任鎮迪道翰圖赴任臣知其誠實可靠隨面諭抵任後確查情形據實稟覆嗣於十月內原任鎮迪道德爾炳阿丁憂回旗過省謁見臣詳

加訊問據稱新疆屯田收成分數烏魯木齊等處較伊犁  
不同原以地有肥磽難以一律檢查道署案卷歷年瑪納  
斯濟木薩等處兵民爭水之案紛紛皆由地多水潦水足  
之處每得豐收水乏之處不免歉薄向來管屯各員具報  
分數俱係哀多益寡通盤核計詳報其實兵丁內每有終  
歲勤劬不能足額設法彌補者近復加增分數官則恐懼  
處分兵則畏受鞭扑以不可逆料之收成先定以必不可  
少之分數彌形竭蹶聞上年具報收成十七分有零兵丁  
內尚有賠累等語嗣於十一月初間翰圖稟到核其所稟  
情節與德爾炳阿大畧相同並據稱每兵一名原額止種  
地二十一畝因分數加增遂暗加種至三十畝近經復行  
加增每名加種至四五十畝之多一名耕二兵之田勢難  
照料間有扣餉雇人幫種者倘收成仍不及額即以應闕

奏六十五

食米扣抵或令設法賠補遂不能贍養妻孥是加增分數徒滋兵累等語適前署烏魯木齊都統圖恩義回京過省臣復於接見之時詳加詢問所言與該道等所稟無異以此互相參攷似屬實在情形臣伏查新疆各處屯田分數賞罰章程原議伊犁每兵收獲細糧至十八石烏魯木齊每兵收獲細糧至十五石者官員議叙兵丁加賞伊犁收至二十八石烏魯木齊收至二十五石叙賞倍之其伊犁收獲十五石以上烏魯木齊收獲十二石以上准其功過相抵不及者官員議處兵丁責懲其塔爾巴哈臺烏什古城吉布庫蔡把什湖牛毛湖各屯照伊犁之例哈喇沙巴里坤照烏魯木齊之例辦理嗣於本年三月內復經原任都統海祿奏准古城吉布庫二處收成分數報至二十四分濟木薩報至二十分如再能加增照伊犁二十八石之

例從優叙賞其提標中左右營瑪納斯庫爾喀喇烏蘇精  
阿等處交至十五石以上者僅准功過相抵交二十石者  
方准議叙得賞交至二十六石者方准從優叙賞即巴里  
坤吐嚕番塔爾納沁等屯雖不能一律照辦亦不便相沿  
舊日分數均須比較上年分數加增至三四分以上者再  
為請 旨議叙給賞此向來定例及以後加增之原委

也 臣查伊勒圖原定賞罰章程及海祿續請加增分數其  
意原為裨益倉儲多收糧石起見惟是地土有肥磽水泉  
有盈絀均非人力所能爭一兵承種地二十畝期以二十  
八石二十六石之豐收在內地大有之年收成尚罕至十  
分今口外地畝轉報至二十分二十四分此必非二十畝  
地力之所能勢不得不暗為加種以一兵種二兵之地又  
非一人力作之所能其勢不得不加夫幫種於是扣餉雇

人在所不免迨耕種之後在地肥水足之處或可及額豐收而地瘠水少之區仍自收成歉薄屯員顧惜處分自必虛報分數兵丁懼于責處又必多方彌補既將加賞鹽菜銀兩貼補賠償又將應關月餉存倉扣抵甚至終歲勤劬無以養贍家口殊非所以仰體我皇上軫念邊疆惠養士卒之至意祇因各處辦事大臣每年積習相沿止報收成加稔並未將兵力拮据情形縷陳 聖聽竟至下情壅於上聞況原定分數章程已虞竭蹶今乃復議加增向之准叙賞者改為功過僅堪相抵向之功過准抵者改為議處議責似此年復一年殊屬不成事體且設兵原為操防如果兵力從容則稼穡之暇仍可隨時訓練若以一歲之力尚不足收成之數更何能復有餘力以事操演行之日久將使兵盡成農所設營伍亦屬有名無實更非

聖主整飭邊防之遠計也再濟木薩等處廣招內地民人開墾期於膏腴日闢歲獲豐戶民樂於耕地則編戶頻歲加增桑麻雞犬烟火相望新疆與內地無殊更為億萬載教寧之計 聖明遠慮本極周詳今地有餘而水不

足非但兵民爭水訟牘紛繁抑且兵丁加占之地愈多而民人承墾之地日少此等戶民原為種地而來並非土著如田畝不敷墾種即現在戶民尚恐其易散更安望將來再有加增倘數年之後煙戶漸稀人民漸少更與新疆無益至口外地方如果有每年必須廣收糧石以備官兵口食情形則又不得不另籌辦理今即以烏魯木齊瑪納斯濟木薩三處而論每歲屯兵口糧需三萬餘石就去歲屯田收穫九萬石有餘是一年所收已有屯兵三年之食況烏魯木齊所屬現存倉貯截至四十八年年底共有京斗



糧八十餘萬石而伊犁四十八年奏銷冊報亦存貯各色糧五十四萬餘石均可無虞缺乏似不必強兵力所不能屢增分數况每年加報收成鮮能及額究與邊屯實政仍無裨補殊非核實辦公之道臣所知者雖止烏魯木齊所屬恐伊犁等處情形亦未必相仿臣受恩深重何敢因循緘默上負聖恩惟有據實奏明請旨勅

交伊犁將軍烏什參贊大臣烏魯木齊都統將各處屯田分數據實查明酌量情形妥協議奏恭候聖裁

議陝甘兵儲疏乾隆五十年

福康安

協辦大學士陝甘總督臣福康安謹奏為遵旨籌

議覆奏事竊臣接准廷寄欽奉上諭據俞金鰲奏

稱聞得從前陝甘兵丁平日皆預備乾糧一遇征調即可剋期起身自平定準噶爾回部之後遂因循不復儲備等

語兵丁乾糧自應平時籌辦以備緩急之需如恐有霉朽  
原不妨出陳易新抵放兵餉著傳諭福康安即留心妥辦  
以復從前舊制將此遇便傳諭知之欽此遵 旨寄信  
到臣仰見我 皇上睿慮周詳屢念邊陲要地期於未  
雨綢繆兵可百年不用不可一日無備之至意臣檢查舊  
案乾隆初年經署寧遠大將軍查郎阿條議陝甘各營原  
有儲備征兵裹帶口糧之制嗣因平定準噶爾回部以後  
日久因循遂停預備今荷 聖明指示自應妥為籌辦  
以復舊規惟是舊識每兵一名預備粟米一京斗白粳炒  
麪各十二斤八兩以為三十日口糧臣竊以裹帶粟米如  
無薪水之處不能為炊不如炒麪一項即可拌食無須炊  
爨且設有軍需之事早則數日遲或半月自當安設糧臺  
若每兵裹帶一月口糧計一人攜帶三十斤以千人合計

即有三萬斤勢必於軍裝駄載之外伏添輜重殊形累墜  
不便遠行茲酌擬每兵備貯炒麵十五斤足供半月之糧  
令各該營核明移交駐劄及附近州縣即在倉貯麥石內  
支給營員磨炒成熟各梨口袋標記本兵姓名收貯軍庫  
仍按季更換給散各兵即以抵應得月糧如有收藏不謹  
以致霉變不堪食用者即著落經管營員賠補毋許押派  
兵丁承領仍即陸續辦製出陳易新源源積貯設遇調遣  
立時携帶起程即倉猝未設糧臺而征兵亦不虞枵腹矣  
但既籌出征帶裹之糧尤須先有訓練備戰之兵且查陝  
甘邊地巖疆原屬重兵所聚嗣因節次裁移兼派屯防口  
外以致實兵較少先於乾隆四十六年遵 旨議添兵  
一萬六千七百餘名近復仰蒙 恩旨賞添兵三千名  
現在添營設汛棋布星羅行伍更為充實伏念 國家恭

養士卒原期有一兵即收一兵之用無論馬步均屬可戰之兵惟是兵多貴精正當於養兵不用之時挑選健壯勤加訓習督撫提鎮各標具精練之兵多者二三千少者亦不下千餘名一有調發即可帶領遠征尤為預備不虞之計即以蘭州省城而論臣標五營額兵三千名除額外外委及各營字識均在額兵數內又有派往口外屯防其實在差操兵共二千七百四十九名加以城守營現兵五百三名此內城守營兵分派墩汛及每日押解違犯護送糧餉等差計不敷用尚須由臣標五營兵內撥協又自臣衙門暨各將弁署內均有該班兵丁統計撥協應差者共需七百數十名計此外別無差使可以常行訓練者已挑出二千餘名勤加操演即該班之兵每日在署仍可親試技藝隨時訓練其堆撥看兵亦係輪班下班之兵每於下班

之日不廢操演其應差兵丁差竣仍令歸伍演習則此數百名亦屬可以備戰之兵至於操演之法臣查向來綠營陣勢止係兩儀四象方圓各式此皆傳之前朝相沿舊樣平時校閱雖屬可觀臨敵打仗竟實無用在各營演試之時明知所習非所用不免視同具文飾觀塞責自不若京營陣式講肄精詳即如九進十連環等勢果能演習嫺熟施之行陣實堪剋敵奏功且去年抵省後即仿照京城健銳火器等營陣式募送提臣轉發標營各鎮屬一體照錄存營如式演習改去故套以收實用再如演習連環原為臨陣擊賊之用乃綠營兵丁平日演放帶藥不過數出藥盡而止設遇臨敵之時敵未退而藥已盡何能制勝且操演省標各營烏鎗連環不許拘定出數惟令多帶火藥演放其應否停止悉聽臨時號令庶兵丁演放之際不能預

定出數多寡閱時長短雖平常操演亦如戰陣之時積久  
久純熟可免臨時生疎又綠營施放烏鎗均係膀根不能  
擒住鎗靶有似開弓之勢過於高仰以致不得準頭且臨  
陣之時未見賊而鎗已亂放及賊至而藥已將盡更復慌  
張尤非紀律此皆將弁偷惰因循未經認真訓練之故臣  
嚴飭各營如法教演期於發鎗之勢合式可以盡得準頭  
鎗不虛發嫻習於平時庶不致倉皇於臨事其各兵內習  
弓箭者打烏鎗者演習馬上鎗箭者令其每日各照所習  
之技在各本營分操逢五之期各營令在一處比試為小  
合操逢十之期為大合操除肄試各項外即操演九進十  
連環之陣臣親往較閱即以兵丁之優劣驗將弁之勤惰  
分別懲獎雖值寒冬不令停止並酌量各提鎮標之大小  
令其挑出備戰之兵自二三千名以至一千二百名不等

西安將軍標撫標亦酌定兵數均照臣標認真操演常無間斷務俾技藝盡熟精嫻計將軍督撫提鎮各標共可得二萬餘其各協營路額兵多寡不等今定以兵數在三百名以上者即挑出一半勤加操練計又可得萬餘合之兩省足有三萬餘訓練精嫻一呼即集之兵將兵丁花名暨帶兵將弁註定冊籍由各營送臣查驗如有兵丁事故及技藝生疎者即行裁汰於冊內開除另挑勇壯入冊補額仍將各營將弁預為派定不派別差專意訓練練兵之員即領兵之員使將與兵素相嫻習不致臨時兵不顧將將不顧兵並令教演兵丁之員弁將部頒遵 旨酌擬行軍紀律數條時時告誡提撕俾知臨陣退縮者欲惜命而不免刑誅奮勇爭先者雖捐軀而終膺卹賞庶幾軍律嚴明人懷果銳一變絳營怯懦之習俾三萬人咸成勁旅即

此三萬之外不在挑選備戰數內者仍飭隨時實力操演不令技藝生疎期於無一非可用之兵至軍興之際備帶軍械火藥帳房馬匹均關緊要在衝鋒陷陣之兵勢難兼顧必須另兵經營俾免分心此項兵丁亦應早為派定若干另造一冊將所管軍械鉛藥及看守帳房牽喂馬匹各差使於每兵名下註明亦送臣衙門查核設有緩急均可按籍而稽朝調夕發不虞遲滯矣至挑兵入伍之始尤為吃緊查綠營積弊凡有年衰技劣之兵輒事姑容佔額糜餉迨出缺挑補時又瞻徇情面以幼丁當充更為惡習臣抵省以來遇有目標兵缺必親自驗補並移行各提鎮一體親驗拔充仍令嚴飭所屬各營員將舊存老弱兵丁全行革退另募年力精壯漢仗高大之人頂充毋許徇情濫補其拴養馬匹尤須飼喂飽騰牧放得地毋許刻減草料



缺額瘦臣不時派委妥員查驗如有情弊即行據實嚴叅再臣查行軍之法既有勁兵又資利器乃外省綠營一切軍械均非利用雖年年查驗無虧仍不免有名無實即如鎗靶多係松木製成外用硃油徒事飾觀而木質鬆脆不能堅久臣前在軍營所見鎗靶一經磕碰即有損壞當臨陣之時損壞一桿即少一鎗之用且鎗靶火機製造均不合式以致兵丁施放不能合手臣已另給式樣妥為製造並將鎗靶改為榆木不施油漆期於樸素堅緻施放便利又如砲位演放不勤即易銹蝕且砲手生疎一時不能得準至弓久張而不弛豈能及遠又如刀矛鑄造不精鋒芒挫鈍何能殲敵烏鎗日久不洗必致火門澁滯豈能擊放迅捷似此武備廢弛雖有器械猶之徒手也臣幼年早荷

天恩侍直

內廷夙蒙

聖主教導訓示又曾在

軍營學習行走此等事件粗能諳悉今荷封圻重寄兩省  
營伍均係臣之專責何敢少事因循致負我 皇上整

飭戎行之至意惟有隨時查驗勤加講習力為整頓總期  
兵精器利人器相習庶幾有一兵收一兵之用至軍行遇  
雨事屬尋常全在遇雨之具製備齊全便於攜帶若當乘  
機進勦之時或因雨濕軍裝逗遛烘烤坐失機宜去年剛  
塔在馬家堡之事可為明鑒臣已飭各營務將各項營械  
預製撐雨油袋妥為備辦庶免臨時周章至如火藥鉛丸  
尤關緊要臣前在川鎮時各處均有備貯火藥三年五年  
不等出陳易新自抵陝甘通查各營具足備三年之處甚  
少加以去年勦賊復有帶缺撥缺現在移行各提鎮查明  
實貯之數具覆到日再行通盤籌酌另議具 奏謹將臣  
遵 旨儲辦征兵裹帶乾糧並即挑演備戰兵丁及整

理軍裝器械各事宜恭摺 奏覆伏祈 皇上睿鑒

議設循化廳學疏 乾隆五十年 福康安

協辦大學士陝甘總督臣福康安謹 奏為奏請添設廳

學以廣教化事竊照陝甘二省回民較多仰蒙 聖澤

涵濡以養以教均沾 丕冒鴻慈自農工商賈而外多

有食糧充伍並且中式武科者每荷 天恩擢用至提

鎮大員至於弁兵人等更屬指不勝屈恭惟 聖主一

視同仁漢回並無歧異惟是回民習武者多而習文應試

之人甚少臣竊以含生負性稟賦無殊當使沐浴詩書通

知禮義馴其桀驁之氣即可化其頑梗之風則教導回民

洵為善後之要務臣自蒞任以來即通飭各屬每於朔望

召集回衆同漢民一體宣讀 聖諭廣訓俾得咸知考

悌睦嫻並令增設義學延師課讀藉以化迪愚頑近據回

民貢生馬有麟赴臣衙門具呈請設立鄉校以資教讀臣  
即面加獎勵准令設立札飭地方官一體實力奉行庶幾  
迎其好善之機導以向化之路且人情莫不羨於顯榮而  
教化端有藉於觀感若使上進有階自必更為踴躍茲據  
署循化廳同知達崇阿稱沿關一帶漢民回族戶口日繁  
從前河州廳移駐循化時考試一事未經議及雖准赴州  
一體應試但距河州窩達有隔至五百餘里者往往憚於  
遠涉無志上進回族見漢民如此更無觀感嘗因公下鄉  
見童稚中頗有俊秀可以造就成材隨增修義學延師教  
讀數月以來不但漢民踴躍即撒拉爾回族亦多有樂從  
苟能迎機添置教職一員以司董率每逢歲科考試由廳  
錄送並應酌予取進名數俾知榮顯以策後效將見茅櫟  
蔚屋絃誦成風即回族民人莫不仰

聖化覃敷漸摩

從善實於地方風俗有裨臣伏思讀書明理不限疆圉革  
薄從忠必先教育我皇上誕敷文教雖新疆塞外亦  
已比戶絃歌況循化廳近隸蘭州該處漢回民人漸濡  
聖化祇因從前未經專立學校教導不先以致愚民無  
由觀感似應准其添設學校以資訓迪並請添建文廟  
以彰文教裁撥訓導以資董率如蒙俞允所有建立  
文廟移設學署並抽撥文武生員進額各事宜容臣另  
行酌議具題為此奏明伏祈皇上睿鑒

皇清奏議卷六十五

皇清奏議卷六十六

陳疏濬海口大河疏 乾隆五十年

劉秉恬

雲南巡撫臣劉秉恬跪 奏為疏濬海口大河以收水利而杜水患仰祈 聖鑒事竊滇池在雲南省城之南即名昆明池土人呼之為海周圍三百餘里受昆明六河之水會為巨津附近昆明呈貢晉寧昆陽四州縣環海田曠資以灌溉者不下數百萬頃滇池之水源廣木狹勢若倒流所恃以宣洩者惟在昆陽州之海口大河查海口大河一道自龍王廟厯亂石雞心牛舌諸灘至石龍壩曲折而達安寧富民二州縣匯入於金沙江其大河之外又有子河四道名曰洱淙清水新林歸化以洩小清河之水是海口大河為滇池出水咽喉疏通則均受其利壅遏則即受其害稽諸往牒厯有明徵雍正八年曾經前督臣鄂爾

恭設法修濬海口題定歲修銀二百兩用則報銷不用則存貯以備大修之需第查向來每屆歲修僅止挑挖子河去其淤沙其大河各灘或三年或五年動項大修一次乾隆四十二年夏間因大雨時行沙石沖塞海水倒灌內河以致省城一帶猝被漫溢沿海田禾多遭淹沒維時曾大修一次迄今閏歲已久未經大加挑挖日積月累淤阻堪虞思患預防不可不亟為計者臣於上年冬杪督令專管水利之糧儲道永慧前往查勘就其形勢究其源流海口一河居滇池之下游即昆明六河之尾閘南北兩面皆山所開子河四道原為宣洩菁水而設每遇山水暴漲挾帶沙石奔注大河水過淤停積灘漸高水勢不能暢流而大河轉受子河沖塞之患除子河四道本係年年修治仍飭專管之昆陽州照歲修成例辦理外為今之計欲求滇池

順軌必須海口疏通欲求海口疏通必須深挖大河庶得  
直瀉滇池之水建瓴而下不致倒灌內河為害田疇此因  
他治水通籌全局之要務也當將海口河身逐段丈量自  
龍王廟至石龍壩止共長二千八百七十五丈視積淤之  
高低定挑挖之深淺其中水淺之處飭夫下河挑挖水深  
之處照依北河挖淺之法駕用小船撈挖期於沙石盡去  
河道深通則上流有歸下流有洩俾濱海之田可收水利  
而杜水患所需夫價按日計工即於備存大修河工銀內  
動支總期工歸實用費不虛糜庶以仰副我 皇上愛  
民務本之至意

請復給墾沙坦疏

乾隆五十年

孫士毅

廣東巡撫臣孫士毅跪 奏為請將沿海沙坦仍令給墾  
陞科以裕民食以清訟案仰祈 睿鑒事竊惟粵東地



方每歲所產米穀不敷民食全賴粵西穀船為接濟其故緣粵東山多田少地接海洋其為山佔者十之三其為水佔者又不啻十之四可耕之土本屬無幾而民居繁庶商賈充盈就廣州一府而論需米之多又數倍於他郡偶過粵西穀船稀到糧價即不免驟昂臣到任年餘情形畧悉向來濱海居民見有漲出沙地名曰沙坦開墾成田栽種禾稻實為天地自然之美利海民藉以滋生者甚衆乾隆元年及乾隆七年前督臣楊永斌王安國等先後條議請給農民開墾陞科經部臣核覆具奏均荷聖恩允准自此凡有沿海沙坦俱經陸續報墾陞科民情稱便至乾隆三十七年尚書裘曰修驗收直隸永定河工程聲明近水居民與水爭地之弊欽奉諭旨通飭各省督撫凡有瀕水面除已墾者免禁外嗣後毋許復行佔耕維

時經前督臣李侍堯撫臣德保飭司詳將瀕海坦畝禁墾不准報承以現無與水爭地情形奏覆此粵東沙坦前開後禁之原委也查自禁墾以後民間視為官荒轉生覬覦其間良懦者畏事退縮豪強者任意兼并始則偷種繼則搶割逞兇滋事皆由此起徒有當官禁墾之名實起百姓爭攘之路並有商民串通濱海爐丁巧借開築鹽漏為名呈官給照居然栽種禾稻並未熬鹽及被告發又變為養灶名色飾詞搪抵農民見其有禁有不禁因此搶案愈多旋結旋翻糾纏不斷官則束手無策下復因緣為奸甚至明禁暗墾民不納賦而吏則取租情偽請張皆屬事所或有臣於上年春間奉 命調任粵東清查積案體訪輿情知沙坦原屬無碍水道則訟案儘可逐一清楚隨檢查從前李侍堯等禁民墾築原奏係專指內河出水要區恐

高築隄埝有遏水勢者而言並非為大海之濱漲生沙坦有碍水道也惟奏案內未曾分晰周詳地方官一時誤會隨將沿海沙坦一概禁止幾同因噎廢食臣於上年同前督臣舒常分路查勘各屬圍基乘便察視地方情形見粵東傍海沙坦與他省濱水地面迥不相同河湖水勢利其疏暢順流若任民佔耕則地勢日狹自與水道有碍若大海之濱洋面寬廣一望無涯並不以坦之有無形其地之寬窄是此等水面距民居不遠宜漲而不塌海洋多漲一分即民居多增一分衛護實無與水爭地之患臣伏查粵東沿海州縣皆有沙坦其近省之南海番禺東莞順德香山新會六縣為最多利之所在爭趨若鶩與其禁之而陽奉陰違徒滋訟累似不如開之而給求養欲俯順民情國家休養生息百數十年嶺表生靈日繁省會五方雜處

食指尤衆我 皇上念切民依凡山頭地角苟利耕耘無不准令樹藝惠此羣黎乃粵東以千百頃無碍水道之沙坦一旦置為廢壤實為可惜又復毫無限制似禁非禁不官不私以致窮民不甘紛紛結訟殊非覈實辦公之道臣愚以為若將此種沿海無碍沙坦照舊給民承墾陞科即以千頃為計每歲約可添穀十萬餘石即毋庸全仗粵西穀船之接濟裨益民食正復不少再濱海荒地若嚴禁開墾則村墟寥落人跡罕到盜匪易於出沒沙坦一開則凡荒陬僻遠之區悉成沃壤膏腴之地無業窮民俱得搭蓋寮舍盡力南畝既可潛消其為匪之心而洋面盜船遙見耦耕饁餉農民皆有守望自不敢停泊往來肆行無忌於地方便可寧謐矣

陳漕運湖河支幹疏 乾隆五十年

阿桂

大學士臣阿桂兩江總督臣薩載河道總督臣李奉翰謹  
奏為遵 旨勘籌先行覆奏仰祈 聖鑒事竊臣

接奉乾隆五十年八月初七日 上諭據管幹珍奏查

催漕船往來河干諸湖堤堰閘座涵洞具存或河深而支  
湖不通或湖中存水不多亦有竟至淤涸者等因欽此臣  
等跪讀 聖諭仰見我 皇上厯念湖河務使幹支  
聯絡於漕運民田兩有裨益之至意臣等職司水土況本  
年湖河水小濟運所關敢不悉心勘籌及時妥辦以慰

聖懷奉到 諭旨當即分委該管水利河務道員各

就所屬境內將湖河支幹逐一履勘通塞情形何處應行  
疏導分別官修民修即速詳籌妥議一面稟覆一面興辦  
以期無誤新漕永資利賴伏查江南運河自山東交界之  
黃林莊起至蘇州計程千有餘里中隔黃河大江上下運

河分為三道其由支達幹由湖入河情形不同節宣各異如黃河以北之邵宿運河綿長三百八十餘里雖恃駱馬湖為蓄蓄而該湖在宿遷之西北承受東省蒙沂白馬諸河之水由皂河進下之五柳二閘入運祇能濟運河之下截其自宿遷以上總以東省微山湖來源為正支本年因臺莊以至河成三閘一帶水小不足運行且等不得已將蘇家山水線河開放引黃由勒家河濟運誠如 聖諭霄屬一時權宜之計原非河工正辦水過不免沙停且等已飭道歷乘此四空漕船未至測量淤淺處所趕緊疏浚深通並將蒙沂諸水之在駱馬湖以上由盧口壩徐塘口沙家河入運各處即為堵閉收蓄使來源由隅頭湖而歸駱馬湖並將尾閘五壩堅閉不開以為蓄濟運之資該河僅有容水之地支河亦屬通暢惟患來源之減小無患

脈絡之不通北黃河以此運河之情形也其黃河以南之  
淮陽運河自運起至於瓜州計長三百四十餘里地形北  
高南下專藉洪湖為來源向患水大不患水小如今歲洪  
湖未曾發水實為多年未有之事運河西岸之寶應汜光  
高郵邵伯諸河皆承受本地雨水並洪湖盛漲由山盱五  
壩分洩之水滙歸於湖各湖遇水大之年由西岸二十四  
港口入運從東岸南關五里車運昭關等壩洩入下河湖  
蕩歸海近年仰蒙 睿謨廣運如遇洪湖盛漲悉由東

口下注山盱五壩節宣有制高寶諸湖水勢甚小東岸之  
南關車運等壩堅閉不開下河民田永無水患西岸通湖  
各港因河高於湖俱經堵閉亦不使運河之水分洩入湖  
惟邵伯迤下湖高以河湖水由西岸以內通湖之二河鰍  
魚各港入運分注金灣六閘等處歸江東岸則下河一帶

形如釜底常藉運河之水由各閘洞分洩下注灌溉民田  
所有兩岸閘座涵洞外高內窪皆以備運河之分洩並不  
藉支港而入運總因本年雨澤稀少處處湖河水小多藉  
長湖之水分潤以致運道淺滯非湖深而支河不通亦非  
湖淺而容納無地此淮揚一帶運河祇有分洩之路並不  
藉旁湖支港濟運實在之情形也至於大江以南之運河  
則恃江湖為吐納以太湖為來源自鎮江以至蘇州兩岸  
支河汊港本多然支港之深淺亦與運道相平高下不甚  
懸殊本年因太湖來源不旺江湖亦小夏秋之間兩岸民  
田車水灌溉晝夜不停以致運河水勢日淺而無錫陽湖  
交界之伍牧洛社一帶地勢稍高水落更覺露淺據該府  
稟報約長四千丈應行挑挖臣等業已派員勘估剋期興  
工疏浚以便商賈往來並空重糧船行走此外如練湖汎



洸諸水凡有幹支可通應行疏治可以導引入運者俱在  
勘籌辦理所有江南運道情形並臣等現在遵 旨勘

籌辦理緣由理合先行繕摺由驛覆 奏

陳查勘湖河情形疏乾隆五十年 阿桂

大學士臣阿桂謹 奏為 奏 聞事竊臣於本月初七

日自清口啟程由水路至韓莊沿途察看運河水勢尚屬  
充餘抵壩回空首幫漕船俱已挽入江境之黃林莊南下  
足數浮送惟大泛口等處間有噴沙淤淺現已派員隨時  
撈挖十一日抵韓莊撫臣明興因查賑催漕至此十二日  
河臣蘭第錫亦自豫回東俱前來會晤臣與之面商籌酌  
並細加訪察東省湖河水勢足敷儲蓄泉源支幹亦俱已  
疏浚深通無庸再為辦理惟運河東岸有墨河一道發源  
於郟城東北墨泉長六十餘里至江境入沂河歸駱馬湖

該河於乾隆十二年開浚現在不免淤塞泉源未旺此河雖係小支亦應一併疏治俾泉水增長入幹歸湖於下游運河有裨又嶧縣有礮石河發源廟山陶溝河發源於平山兩河之水滙歸於陶溝橋南注趙村湖由黃道人橋入運間段稍有淤阻而趙村湖湖面雖不甚寬大為衆水滙聚之地地勢稍低黃道人橋河前經奏明疏濬應將黃道人橋下落低數尺挑淤出水亦於運河有濟此兩處工程祇須令山東江南地方官河員各為勘明實力辦理毋庸動帑至西岸通湖入運之支幹各河俱經疏浚通順其無闕運道之支河汶港因黃水經過一律淤平已無形跡可尋本年雨澤稀少此等涓涓細流雖於湖河無大裨益但於坡水下注時多一貫通之路即多收儲蓄之益臣與蘭第錫明興酌量惟有於修治道路時兩旁挑挖深溝即以

溝內之土填高道路一遇雨水充足田塍之水盡歸道旁溝內而溝內之水又可通達流入支幹各河源源入湖則田塍既免積潦之患而湖河又收灌注之資為一舉兩得容俟春融凍解後撫臣明興即勸諭閭閻實力辦理至微山湖水勢臣前往詳悉履勘測量現在水誌七尺五寸湖面高於運河面四尺四寸查每年春間開壩時消水起至伏秋長水時止消水不過二尺餘寸則微山湖現在所收之水接濟明年新漕似足敷用況該總河商同道員沈啟震擬將獨石山湖不能盡出之水再行設法全歸昭陽湖下注微湖尚冀陸續增長以資收蓄再臣沿途詢問農民九月十七八兩日得雨深透晚禾收麥結實飽紋有收閭閻藉此接濟已種之麥得此雨澤滋培盤根深固長發茂盛未種者亦一律播種齊全民情甚為靈貼所有查勘微

山湖及現在情形謹恭摺具奏伏乞

皇上睿鑒

議移建清口壩工疏乾隆五十年

阿桂

大學士臣阿桂兩江總督臣薩載河道總督臣李奉翰謹

奏為酌擬移建清口東西壩工恭請

聖訓遵行事

竊查清口淤墊上厓

宸衷臣阿桂奉

命來江查

勘實由淮水過弱所致業將借黃水以送回空蓄清水以  
濟重運並於陶莊新河壩尾稍上另開倒溝引渠過水預  
備接濟各緣由奏蒙

聖鑒查洪澤湖水自築壩攔截

後高堰誌格現存水三尺餘通湖引河又次第估挑一俟  
湖水蓄高明春重運將臨即可開放濟運惟是舊設清口  
東西壩工蓄清抵黃為全河最要關鍵該壩原建於風神  
廟前距通湖各引河尾長四百二十餘丈自乾隆四十一年  
開挑陶莊新河後黃流直至周家莊一帶下注滙清歸

海清水出口路長將東西壩移下一百六十丈於平成臺處建築至四十四年因湖水盛漲東西兩壩全行展拓迤下一帶河面寬濶水勢紆緩又 奏明移下二百九十丈在於惠濟祠前建築以逼清抵黃迨至四十六年冬間洪湖存水較小清口口門收窄後湖水仍見消落又於風神廟迤上 奏明添築兜水壩工以為重門關束使湖水多入運口濟運四十七八九等年將兩層壩工隨時相機一體拆築尚屬得力本年湖水過小黃水盛漲清不抵黃以致黃水直灌入運雖為近年僅見之事但黃強淮弱由來已久自不得不因時制宜於黃水未經入運之先設法抵禦查從前清黃交匯處所即在惠濟祠前今黃流北趨由周家莊下注自通湖引河尾以至清黃交匯處河長一千三百餘丈所設清口東西壩雖較從前已移下四百五十

丈現居適中之地但相距清黃交匯處尚有五百餘丈仍覺稍遠似應量為改移臣等公同相度詳晰籌勘現有之兜水壩在於通湖引河以下運口以外於束清相宜應照舊存留加鑲寬厚即以此壩為束清壩其舊有之東西壩應再移下三百丈於福清卷前建設以之禦黃如遇黃水過大之年即將口門收窄不使漾入如遇清水過大之年迤上兜水壩相機折展此壩亦一體展拓俾資暢洩並將束壩做長以攔黃水迴溜西壩收短使清水直出抵黃如此則外有東西壩禦黃內有兜水壩束清無論湖河水大水小之年相機折展收束均可應手得力似屬兩有裨益其惠濟祠前現有東西壩今歲本未折展查風神廟惠濟祠前一帶從前為淮黃並流是以該處河面寬至二百餘丈今黃流北趨專係淮水由茲東注河面過寬清水益覺

無力本年因黃流倒漾清口兩腮俱長有淤灘現在河泓寬不過十丈內外將來即遇淮水長發亦不過刷寬至五六十丈儘敷行走是惠濟祠前現有之壩不妨聽其存留毋庸拆毀以護兩岸灘崖庶清水多一層關束更覺有力足以禦刷刷沙再東南兩壩每年恪遵欽定機宜酌視洪湖水勢大小隨時拆展辦有成規惟從前止定有湖水加長拆壩限制其湖水消落應如何按照尺寸收束留存口門若干未曾酌定雖蓄洩機宜原在隨時達變而尋常收蓄亦當議有定制以便遵守臣等公同籌酌東西壩口門水深溜激所留不能過窄嗣後應按照高埝誌格如湖水消存四尺料口門酌留二十丈湖水消存三尺酌留口門十二丈湖水消存二尺酌留口門八丈庶節宣均屬有制更可永資利賴矣

陳會勘運河情形疏 乾隆五十二年 阿桂

大學士臣阿桂河道總督臣蘭第錫山東巡撫臣長麟謹  
奏為遵 旨會勘具奏事竊臣蘭第錫等節次奉

諭旨以東省運河大小修之例有名無實徒為屬員開  
銷地步又曹單所屬支幹各河本年甫經派令明興勘估  
興修何以為日未久又有停聚新淤之處令逐加履勘核  
實辦理等因欽此又臣阿桂接奉 諭旨令於前往江

南勘工之便順赴東省運河會勘查明確實具奏欽此臣  
阿桂行抵東省當即取道於沿河一帶會同臣蘭第錫等  
詳細履勘緣東省運河韓莊迤南及江境邳宿等處俱以  
微山湖為水櫃從湖口雙閘而出專濟韓莊迤南運道至  
韓莊迤北係資汶水由南旺分水口而出兼濟南北其南  
旺塘河因分水口之水自各山而下源源不絕又該處地



勢最高上下兩關啟閉尤嚴每歲停淤甚厚而汶水北流一過衛河水長不能抵禦倒灌入口臨清塘河亦易受淤且每年伏秋汛內山泉出運水挾沙行如濟寧彭口暨大泛口等處每發水一次則淤墊一次非加挑挖重運經臨憲致淺阻而期限緊迫所設額夫不敷分挑不得不動項募夫挑辦此運河大小挑之所由設也本年運河一帶雨水侵沾曹單支幹各河疏濬深通微山湖收水已逾定誌湖口雙關出水較大土騰下注雖以大泛口等處素號砂礮難挑亦因微山湖水勢暢達大資濬刷沙淤較少而汶泗諸水來源盛旺臨清塘河既未倒灌濟寧塘河亦停淤甚薄臣等復溯查運河水大之年挑工必少如乾隆四十六年豫省曲家樓漫口時濟寧以南水勢浩瀚四十七八兩年內即未經興挑本年運河水既充裕無虞淺澁自未

使仍照向例大挑致滋浮冒臣蘭第錫前在豫省曾向臣  
阿桂言及此事今臣等復奉 旨會同查勘自臨清以

至臺莊按現存水勢逐一打量互相比較內除臨清濟寧  
及大泛口等處現在沙淤既少應同各汛長河內高低不  
平之處均派令額夫挑辦毋庸請動錢糧外惟勘得南旺  
塘河該處本屬水脊停淤復厚又彭口一塘因夏秋河湖  
水大山水出口為之頂阻亦多停淤以上二處臣等再四  
勘度必得及時挑挖庶明年無碍運行查向遇大挑之年  
除將額夫儘數調撥挑挖尚需動用銀一萬七千二百餘  
兩今止將南旺彭口二處確切估計於額夫分批之外實  
需銀三千六百二兩零較向年少用銀一萬三千六百餘  
兩所有挑工夫價仍照向例交各州縣召募承挑工員亦  
無從稍有冒濫至南旺所築大壩係在運河東岸分水口

之內蓋冬令以前汶水正資濟運不能多為收蓄是以必俟回空全過濟寧方得於分水口內築壩收入蜀山馬踏等湖以備春初開壩鋪水之用並於春夏汶水稍弱時宣放以資接濟該湖水誌以一丈一尺為率現在湖水較定誌尚少二尺四寸是該壩藉以截收汶水原專為挑工而設自應仍行堵築況每年築壩興工之時已及深冬守凍之候維時即不敷壩舟楫亦不能行走臣蘭第錫等現復派員於沿河上下曉諭各船戶上緊備行儘數趕出開河俟臨清北河冰合之時再行築壩不致稍有阻碍其應挑工段內 恩諭毋事苛求此乃出自 皇上逾格

鴻慈而年歲偶有不齊原非可一律而論在各省督撫大員深受 天恩簡任斷不敢稍存欺飾第恐不肖州縣有所藉口遂濫收湖灘之米率意兌交而胥吏人等復

從而舞弊作奸均不可不防其新臣查米色之紅白本乎天時而米質之乾潮由乎人力如果各州縣平時查看倉廩認真修理而於徵米時並無浮收僅令將篩搗潔淨之米照數交納在小民實在樂從及上倉以後再加隨時查看設法晒晾則兌運之米必不致稍有潮濕庶運貯京倉可以歷久積貯即旂丁領運在途亦得免霉黴折耗之虞伏懇 特頒諭旨 勅下有漕各督撫嗣後務須督

飭各州縣徵收乾圓潔淨之米交兌運通遵照乾隆二十四年原奉 諭旨不得擅行援例陳請即偶爾遇雨水失調之年亦必竭力風篩晒晾並令各該州縣出具並無潮米甘結由各糧道加結申送且衙門存案總所有界壩土格務於工竣後督飭全行剉淨不任冲卸入河臣蘭第錫臣長麟亦惟有隨時查察切實驗收仰副 聖主慎

重漕運體恤商民至意至本年明興勘挑支幹各河俱在運河西岸微山湖止游曹單等處本屬無源之水俗呼之為坡水一遇大雨時行溝澮皆盈由該河歸於南陽昭陽二湖下達微山湖收蓄迨至秋冬悉成乾涸每當坡水驟發不但田間淤泥隨之而入即兩崖鬆土經水冲刷亦時有塌卸是以停淤在所不免然各該河原為疏消田中積水例應民修在輿情本所願為今年因工程較大蒙

恩借帑興挑分年攤征完款奉有

諭旨令臣蘭第錫

臣長麟督飭地方官實力疏濬每年將有無淤塞之處具奏一次臣長麟因恐日久地方官奉行不力又奏請酌定處分荷蒙

准行在案臣蘭第錫此次由豫工前來臨

清沿途察看凡各河間有新淤之處已經逐加疏濬一律深通又支幹各河內有陶北河一道係在直隸河南境內

而趙王一河亦界直隸山東二省本年俱經挑挖深通應請即照東省之例與該督撫每年將有無淤塞之處一併查明具奏庶地方官知所責成自必隨時查濬於水利民田兩有裨益矣

陳漕務事宜疏乾隆五十二年

毓奇

漕運總督臣毓奇跪奏為敬陳漕務事宜仰祈聖

訓事竊臣仰蒙皇上天恩畀任總漕重寄數年以來

屢荷聖慈指示凡備運培丁各事宜無不勉力遵循

次第料理而其中有今昔異宜必須斟酌變通務期覈實

調劑者謹就臣管窺所及為我皇上陳之竊照漕糧

米色為國計民關例須乾圓潔淨庶可歷久儲積前於乾

隆二十四年江蘇漕糧因被風潮米色未純欽奉諭

旨米色乾潔堪以久貯者許其通融交納紅白兼收不得

援以爲例又浙江米色亦難久貯復奉

旨以倉儲關

係重大逾格邀恩視同常事將來勢必至無所底止此次  
暫准另倉收貯嗣後務一例乾圓潔淨不得濫行呈請援  
例免收以致折耗等因欽此仰見我 皇上於體恤民  
隱之中仍寄慎重倉儲之意上年蘇浙兩省因霜信早寒  
米色未能全純復經各該撫臣奏蒙 聖訓期米皆乾

實永無潮嫩之弊庶可存倉久儲實於

天儲丁力兩

有裨益至於江南省江淮興武二衛所屬旗丁有運丁快  
丁之別運丁管駕漕船快丁向不簽運嗣因該二衛運丁  
並無瞻運屯田於乾隆二十三年經前漕臣楊錫拔題准  
運快一併勾簽隨經兩江總督臣高晉以快丁不諳駕運  
奏明准令快丁繳貼運費給伍丁代辦每年應貼給銀一  
百三十兩如船逢大造之年貼給銀三百兩若遇風火事

故即責成代辦之丁賠補與快丁無涉歷年遵循在案在  
立議之始原屬兩得其益無如近年以來快丁有貼費之  
名而運丁未收貼費之益頻年拖欠催繳不齊蓋緣快丁  
分隸各州縣管轄非衛守備所能徵催而各州縣以無關  
考成之事亦未能認真催解其中奸丁抗繳以及書役侵  
蝕均所不免臣疊檄嚴催並行令江安糧道徹底清查據  
報查明節年快丁貼費銀七千七百餘兩其本年應繳貼  
費除已完外尚有四千三百餘兩未經繳給似此年復一  
年則代運之丁疲累日深恐致有船無丁亟宜立法整頓  
查江西湖廣等省屯丁應徵餘租津貼銀兩前因催繳不  
前經臣奏准部議照正項銀糧例開報經徵考成議處在  
案今江淮興武兩衛快丁應繳貼費關係濟運實與餘租  
津貼無異相應請 旨嗣後江興二衛快丁貼給運造



丁費即照餘租之例責成該管州縣實力催繳定限以州縣奉到糧道提發快丁之日起限於幫船開行過淮之日為止即舊發貼運之丁按年繳貼者亦以開行過淮之日為止由糧道提催齊全解至淮安盤糧廳當按名散給如所繳貼費未能按限全完即查明經徵州縣已未完分數開叅其欠繳貼費即令經徵不前之各該州縣先行墊解以憑濟運如此嚴定處分則州縣自顧考成可免膜視而丁船駕運有資無虞疲乏實於漕政有裨如蒙

俞允

即自今冬新運為始其節年各丁舊欠銀兩一併勒限分年追給以資輓運再各省運丁例支月糧米石除江廣兩省向係全支折色外其江蘇山東河南並浙江之杭嘉湖三府屬各幫均係半本半折支放惟江南省之江淮興武二衛軍船十八幫應支本色月糧例派上江之徽寧滁和

池廣等府州屬支領於康熙二十八年因該府縣地方不通水道支運維艱題准改折每石定價銀八錢解道放給又浙江省之寧波紹興台州溫州處州金衢嚴州等衛軍船十二幫例支月糧於順治十三年因八府不通舟楫題照時價徵銀解省買米給軍復於康熙十年照灰石價折銀每石一兩二錢徵給是以各該幫軍丁所領月糧雖有一半本色之名實則全支折色在從前定議之始按時折價原數買食迄今百餘年來 聖朝休養生息生齒日繁米價昂貴所領一石之價僅數買數斗之糧該幫丁等均係挽運正供而本折不同未免日形疲累若令各州縣改徵本色雖非額外加賦但小民之輸納相沿已久未便更張似應另籌米款撥抵查鳳陽淮安湖州等幫應支一半本色從前亦係全行折給經前漕臣楊錫鈸德保鄂寶

及臣等先後題奏改撥本色在案今臣飭據江浙兩省糧道詳查米款別無餘剩惟思藩司衙門地丁南米等項米款繁多向於支放兵餉之外多有餘剩或係折價報撥或係變價充公似可改為各幫本色之用但所餘數目若干是否足數撥臣衙門無業可稽可否仰懇皇上天恩俯念米糧時價不同運丁漸滋疲累勅下各該撫

臣率同藩司糧道確查每年額徵各本色米款內如有本款支剩以及存貯變價之米即照各該幫應支一半本色之數改撥應用仍將各幫應支折價解歸藩司抵款一轉移間民賦不加庫項無碍而運丁得受本色之惠永無疲乏之虞頌皇仁於勿替矣

皇清奏議卷六十七

議臺灣屯丁疏 乾隆五十三年

福康安

協辦大學士閩浙總督臣福康安福州將軍臣魁倫福建  
巡撫臣徐嗣曾謹 奏為熟番募補屯丁酌議章程仰祈

聖鑒事竊照臺灣熟番向化日久當逆匪滋事之時  
各社番勇隨同官軍打仗殺賊頗能出力欽奉 諭旨

令臣等悉心籌酌將此項熟番充補額兵實為綏輯番黎  
捍衛邊圉之至計臣等因戍兵仍請照依舊制換防另將  
熟番挑募屯丁酌撥近山未墾埔地以資養贍先經附摺  
具 奏在案茲將應行釐定章程仿照屯練之例逐一臚  
陳於後

一屯丁人數應按番社酌挑令其就近防守也查全郡熟  
番通共九十三社臺灣縣屬番民自數百戶至數十戶不

等約可挑選壯健兵丁四千名分為十二屯大屯四處每處四百人小屯八處每處三百人作為額缺毋庸另設屯所即今在本社防守地方稽查盜賊其戶口較少之社或數社并作一屯或附入近處大社庶番民等不致遠違鄉井而校驗調派亦易於齊集至各屯相距之地道里難以適均臺灣縣所屬番社不過數處不能多設屯丁然臺灣縣地界本狹郡城設有重兵足資彈壓惟南北兩路近山險要甚多淡水一廳尤為遼濶原擬熟番在隘口搭寮防守名為隘丁零星散處不能得力應酌量地勢情形按照番社多寡分別設屯與各處營汛官兵聲勢聯絡則稽察巡防自可倍加嚴密矣

一各屯番丁宜設立屯弁以資管轄也四川屯練兵丁額設屯土守備千總把總外委等官一百餘員今臺灣番屯

升目無需似此之多祇應仿照其例量為設立查各社原有民人充當通事管理一社之事代為交納社餉但此等通事積年充役係地方簽派本非番人同類未便用為升目內擇其曾經打仗出力及番社素所信服者如岸裏社潘明慈之類揀選拔補於南北兩路額設屯千總二員統領番衆屯把總四員分管各屯大小各屯每處設屯外委一員花名圖冊交理番同知稽核仍將各屯事務交北路協副將南路營叅將就近管理該番等素嫻技藝非招募新兵可比應請照川省屯練之例毋庸歸營操演點驗屯丁拔補屯弁等事統歸臺灣鎮總兵臺灣道管轄詳報督撫給與劄付報部存案經營六年後如果董率有方曾著勞績由鎮道核明詳報督撫加一等賞給職銜以示鼓勵倘所管內有生事廢業之人及苦累番衆情弊即行咨革

完處遇有事故缺出仍揀選番社悅服之人詳報拔補  
一屯丁屯弁毋庸籌給月餉應酌撥近山埔地以資養贍  
也臺灣東界內山本多曠土乾隆十五年暨二十三年節  
經勘定界址 奏請禁民越墾准令熟番等打牲耕種以  
資生計無如游民聚處日多越界佃耕漸成熟業以致爭  
奪滋事控案甚多前經富勒渾奏明專委鎮道確切勘丈  
尚未詳報即值逆匪滋事現經 臣等提卷核查共計丈出  
已墾埔地一萬一千二百甲均應查明民墾番墾分別升  
科辦理此外尚有未墾荒埔五千四百四十一甲又四十  
八五十一等年漳泉械鬥及互控結會案內抄沒翁雲寬  
楊光勳等入官埔地三千三百八十餘甲統計抄沒未墾  
及入官荒廢埔地八千八百餘甲均屬界外之地逼近內  
山任其荒廢地利既屬可惜而愚民越利如鶩亦難保無

越境私開情弊應請將新設屯丁四千名每名撥給埔地  
二甲十總每員十甲托總每員五甲外委每員三甲今其  
自行耕種責定地方官勘定界址造冊繪圖通報立案以  
備稽查屯丁出缺即挑其子弟充補承受田畝如有私行  
典賣者照律治罪追賠契價充公其地仍歸番社再查臺  
灣各社向例交納社餉所種田畝祖賦蒙 恩概免徵  
收所有撥給埔地應照番田之例免其納賦以示體恤毋  
庸另行籌給月餉

一清查已墾埔地以定界址也查臺灣東面倚山地方寬  
廣從前因淡水彰化二處墾闢日增另行畫定界址設立  
土牛禁止奸民越界佔墾免滋事端乃因生聚日繁民人  
私向生熟番佃地耕種價值稍輕者謂之租贖價值稍重  
者謂之典賣熟番等歸化日久漸諳耕作祇以業經典賣



與民無由取贖是以各處番地不特嘉義以南多有侵越即淡水等處續定土牛之界亦成虛設臣福康安追勦賊匪時周歷全郡所過近山地方良田彌望村落相聯多在輿圖定界之外舊設土牛並無遺址可尋從前設立時不過築土作堆潦草塞責本非經久之計此時若不將埔地徹底清釐事過境遷界址必仍滋清混臣等悉心籌酌除未墾荒埔五百四十餘甲撥給新募屯丁外其已墾之一萬一十餘甲自應分別辦理查臺灣徵糧則例仰蒙皇上優卹海外民番恩施格外於民田則薄徵租賦於番業則概免陞科茲查民人租墾之地無多原係民為佃戶番為業主自應同番社田畝一體免科其業經賣斷與民者既非番業即應令民戶一體報陞第民買番地之後所費開墾工本原多又有每年抽給番租之例若

在徵收本色民力未免拮据應照同安縣下沙科則按甲計畝徵銀免其納粟仍出示曉諭番社使知租額無虧俾得永資生計民人等藉有納賦明文世守其業亦可永杜爭端其集集埔虎仔坑三貂瑯嶠等處接壤生番私墾田畝甚多此等偷越民人本應逐加懲治惟念開墾以來與生番日久相安並無事故一經驅逐沃土既須拋荒而游民又無歸宿應請照新定民墾番地之例一概陞科免其查究此時正值農忙之際未便紛紛履勘應令該處民番將祖贖典賣地畝先行呈報一俟刈穫登場臣徐嗣曾專委大員前往抽查分別辦理咨部存案自此次清查之後即以所墾地方為界豎立界石大書深刻俾人一望而知仍交與巡視臺灣之將軍督撫提督及地方官等不時周歷巡查有越界私墾即行從重治罪

一屯丁習用器械應令自行製備報官查驗也查番民打牲捕鹿所用標鎗鳥鎗竹箭器械不一均屬犀利即如岸裏社番善用鳥鎗隨官兵打仗殺賊最為賊匪所畏一切器械均可毋庸製給但現在嚴禁民間私藏軍器屯兵所用鎗箭亦應官為點驗以備稽查所有新設屯丁四千名不必照綠營之例拘定鳥鎗兵若干名弓箭兵若干名祇以該番習器械為準呈報總用兵逐加印烙編號備查每年今總兵巡查之後點驗一次如無火烙印記即照民人私藏軍器之例一體治罪

一屯丁徭役酌予優免以卹番力也查臺灣各社熟番質樸循良最堪憐憫從前文武員弁出差巡察無不調撥番兵背運行李其餘如地方興築遞送公文等亦皆社番應役其勞苦急公之處較之臺灣民人不啻數倍今既挑補

屯丁各令在要隘地方分屯防守遇有搜捕盜賊等事又  
須聽候征調所有一切徭役應請免其承應其未補屯丁  
之番民亦祇令遞送公文不得以私事役使倘地方文武  
及理番同知不加體卹有苛派擾累之事今該鎮道實力  
訪查嚴行參究以上各條謹就臣等管見所及悉心籌議  
是否有當伏乞 皇上睿鑒施行

議西藏善後事宜疏 乾隆五十四年

鄂輝

成都將軍臣鄂輝四川提督臣成德謹 奏為 天威

震攝巴勒布侵佔藏地全行收服該番目現已畏罪輸誠  
設誓定界遵 旨酌定善後事宜仰祈 聖鑒事竊

查巴勒布又名科爾喀地處萬山之中在後藏西南一隅  
該番等住耕遊牧之外半以傭藝謀生並有販運糧食貨  
物來藏貿易者歷年交易以通向來和好無嫌惟夷情重

利忘義偶以小番等稅鹽錢物之互相爭衡而噶事布倫等不知體察任聽第巴等縱恣妄為並不妥為經理遂於乾隆五十三年六七月間侵犯後藏邊界仰蒙 皇上

派臣等督師申討官兵用命奮勇前驅原期掃穴犁庭以揚威武乃大兵甫臨其境小醜旋即退避遂將所佔地方全行收復自此藏地教寧邊疆永靖此皆 聖天子德

威遠播故能使從未向化之野夷傾心歸服臣不勝慶幸之至惟藏地噶布倫等安於苟簡諸多廢弛自當亟為整頓臣等謹遵 訓諭酌定善後事宜列款具 奏伏候

聖裁

一後藏應酌撥綠營官兵以資防衛而壯聲威也查扎什倫布為班禪額爾德尼住錫之地其西南一帶毗連巴勒布等外番部落相距前藏十有餘里道途迢遙自應因時

制宜量移官兵駐劄查前藏向駐綠營官兵本有五百十員名該處人烟輻輳且有駐藏大臣彈壓稽查儘足以資重鎮若於扎什布倫地方酌派官兵分駐不惟足資保障而於前藏聲氣益臻聯絡臣等公同酌議東臺察木多及江卡石板多三處原設之兵本多而石板多駐有都司一員此一帶地方極為寧謐該處營官商卓特巴等亦俱知遵奉法紀所駐官兵不過防範地方接送文報之用似可無需多兵致令閒曠今擬以察木多抽撥外委一員兵丁六十名江卡抽撥兵丁三十名石板多抽撥都司一員兵丁二十名前藏抽撥兵丁四十名即令抽撤之都司外委管領移駐後藏再馬兵內挑拔二人作為軍功外委隨同管束如果始終勤慎遇有缺出即行拔補所有官兵應得各項俱應照西藏官兵一例支給如此量為轉移不惟兵

歸實用且免內地添派之煩而口食亦不致拮据矣後藏既經移駐官兵至前藏一路亦應須添設塘汛以達郵傳計前藏至後藏一千餘里酌分安塘汛十二處若以綠營兵丁安設則力又分且滋繁費所安各塘不過以備馳遞文件之用只可以唐古忒番兵安設是以每塘挑選附近番兵四五名就地添設並交噶布倫等辦給口糧均令駐防後藏都司隨時稽查管束以專責成

一後藏之拉子薩克噶脅喀爾一帶例應唐古忒番兵防戍並宗喀濟隴聶拉木等處均宜修築戰碉以資防範也查自後藏以至巴勒布番界尚有一千數百里其拉子薩克噶脅喀爾三處地勢最為扼要為當添設唐古忒防兵方足以壯聲勢應於拉子地添設唐古忒番兵二百名並派第巴二名管領按一年一次更換其派來防守之兵均

今揀選精壯者勤慎操防查噶齊喀爾地勢險峻原建喇嘛寺官寨碉房均在山岡可為鞏固且下山取水地道可通是以前經巴勒布賊番攻圍月餘未能得手第該處水土惡劣不便添設多兵且附近番民尚能防守其薩克一處相距拉子不遠亦即於防兵內撥出三十名輪赴該處以資巡哨再宗喀羅拉木濟龍等處遠在極邊冬春雪大冰堅行人每致阻遏此一帶寨落無多無需添兵防戍徒使外番驚疑臣等於收復原界之後相度形勢即飭隨征之屯練屯番頭人指明緊要處所各令修砌卡隘堅碉以資瞭望而嚴防守所有現設拉子等處防兵均交駐防扎什倫布之都司暨管轄之戴綱時加訓練仍於駐藏大臣巡查之便親加查閱分別勸懲則操防兩有裨益矣

一全藏唐古忒兵丁遵 旨酌定操演技藝以資防護



也查藏內雖有唐古忒兵丁之名向不操演以致臨時毫無紀律又查西藏番兵皆以耕牧為生不便令其照官兵常時操練但不定期演習竟致武備不修殊非體制臣等現飭噶布倫戴綱等按其寨落編定數目前藏應派唐古忒兵丁八百名後藏應派唐古忒兵丁四百名均於每歲秋收九月望後至十月底止隨同駐防綠營兵丁一體習練事畢令其各回本寨照常安業如此更番教演年復一年既可造演成材以資防禦又不致有妨農事實於藏地有裨至操演鎗箭之法必得指教之人查前後藏現設有綠營官兵即於此內挑取技藝純熟千把弁兵數十名充為教習令其分領唐古忒番兵逐日練習每年令駐藏大臣親為較閱擇其學習純熟者酌加獎賞用示鼓勵其教習之弁兵亦察其所教番兵材技之優劣分別勸懲如此

隨時考核則人人咸知奮興而番兵自必日增起色惟唐古忒之兵向無錢糧今定於派出操演日起至散操日止令噶布倫等於伊等辦事噶沙克公所酌定按日給與口糧以免番衆自帶之累並著駐藏大臣時加查察毋許短發又達木之兵原係額魯特根枝自青海撥來向住達木角地方離藏較遠皆以遊牧為生未便照唐古忒番兵調來操演若聽其自為演習仍屬無益查前藏本有輪派應差達木兵八十名向係隨時換班今即以此項應差之兵改為一年兩次更換交綠營將弁歸入操演番兵數內一體教習仍照舊供支並交駐藏大臣於操演之期同為較閱示以獎勵至噶脅喀爾現擬添駐番兵又宗喀濟龍聶拉木原有番兵應交該處戴綱等遵照前後藏之例一體按時操演仍令後藏都司就近稽查以收實效再番兵等

操演器械率多未備著達賴喇嘛商上暨噶布倫等查出修整凡遇操演之期即行按名給領操演事畢仍繳還收貯或有損壞立即修補毋許勒令番兵賠補致滋苦累所需藥彈查此次派調官兵隨帶藥彈除扎營擊卡揚威搜山施放外尚有餘存已飭撤回官兵運交西藏遊擊衙門收貯應即准於此項內照操演兵數日期扣數借給並酌定工料價值令噶布倫等於公項內照數繳還駐藏遊擊衙門遇便解省代為配製隨由駐藏官兵應用藥彈搭解來藏隨時發給應用又查達賴喇嘛山上存有大小鐵炮二十餘位詢之收存已久平時並不操演惟每年正月懸掛佛時抬出施放一次謂之逐疫查炮位係軍火要器容臣舒濂普福查明其中如有損壞者應行銷燬其堪用者編定號數嗣後凡遇操兵之期令綠營官兵帶領番兵

試演準頭學習施放演畢仍即妥為收貯以期武備修明  
一西藏糧臺應建倉備儲以濟緩急也查內地州縣皆有  
倉儲誠屬有備無患之計今西藏遠在極邊處處毗連外  
番凡兵糧武備所關尤要此次巴勒布滋擾後藏邊界調  
派內地官兵前來噶布倫等不能先事預籌以致上煩

聖慮若非

諭旨指飭詳明則辦理難免貽誤茲又

恭奉

恩訓以西藏臺站向無儲蓄

特命籌畫蓋

藏以備緩急仰見

睿謨廣運無所不周臣等悉心籌

酌藏地標麥價值亦不甚昂較之由內地遠道運糧實屬  
價廉工省應請即於今歲秋收後查明實在時價動項發  
交該噶布倫等在於附近各處採買米穀標麥三千石交  
駐藏糧員於扎什城內建立倉廩妥為收貯俟採買二年  
後即按年出陳易新標麥一千石分散兵丁作為口食於

各兵應關餉銀內照買價銀作扣總以六千石常儲為額亦不必過多積存以免霉爛之虞倘遇有夷務邊情可資接濟至拉里察木多巴唐裏唐四處亦皆各有糧員且係通藏大道而察木多猶為川藏適中之地向設將弁兵丁在彼駐劄凡遇官兵經行尤須按站支給裹帶若由內地運送需費較多應即欽遵 諭旨一體儲備以期積少

成多酌定交該糧員按地方情形不拘米穀稗麥每處採買五六百石積儲俟買足二千石後亦當設法出陳易新方免霉變第查該處兵丁無幾不能仿照西藏一體辦理是以酌定即交該處第巴土司按二三年一次出易仍責成駐藏大臣暨該管各上司留心稽察如有不肖糧員短價勒買侵漁滋弊者即予嚴叅治罪從此臺藏俱有備儲不獨於軍旅有裨且足以壯聲勢至所需糧價及修建倉

厥之費應請即於臺費項下核實支銷毋許稍有浮冒實  
於邊務大有裨益

一駐藏大臣與達賴喇嘛辦理事件應酌定章程並補放  
第巴無論缺之美惡均當親往辦事以杜規避而專責成  
也查西藏舊規凡補放堪布喇嘛在衆喇嘛中挑取熟習  
經典者補放本與政體無關原可不必駐藏大臣商辦至  
差遣堪布囊素赴京進貢並赴內地購辦物件往返需  
時且往來更有夾帶貨物之弊應請嗣後均由駐藏大臣  
會同達賴喇嘛噶布倫等揀選妥人給與護牌將需用夫  
馬酌定數目註明牌內沿途照牌交給以杜騷擾再西藏  
所屬寨落設立第巴管理缺分甚多其間美惡不齊然皆  
有地方應辦之事訪詢從前陋弊若遇好缺則所放之人  
親往辦理若其缺苦寒或係偏僻之處則係家丁代為照

料而本人竟自安居在藏此等積習實為誤事之由臣等  
公同商定飭令噶布倫等嗣後無論美惡缺分一經補放  
之後即令該第巴親往管事毋許逗遛不前更不許擅自  
差派家丁代理臣舒濂普福仍隨時查訪倘有復蹈前轍  
規避誤公者立即黜革另行補放倘該噶布倫等徇情蔽  
混查出一並治罪如此則無論地方之遠近與夫缺分之  
美惡均得本人親身前往查辦番民自歸安貼矣

一駐藏大臣暨噶布倫等當按年親往後藏各處巡查一  
次以重地方也查後藏係班禪駐錫之地現擬於該處添  
設官兵防戍必須駐藏大臣隨時稽查彈壓方為有益且  
等公同商酌嗣後應於駐藏大臣二人內按年分為兩次  
輪赴後藏就便前至各處巡查親加操演分別勸懲用肅  
體制以示威嚴再查前後藏番眾散居各處向設大小第

巴不下二三百名分管地方皆歸噶布倫等總理其在近  
藏之區尚易稽查而相距寫達之處耳目難周遇有事件  
惟據該管第巴之夷信即便聽從該第巴等賢愚不一平  
目能否管束番民與夫聲名若何亦皆置之不問遂至因  
循成習日見廢弛自應亟為整理以挽頽風該噶布倫等  
身任領袖總管地方乃平日安居在藏從不親往各處巡  
查即如巴勒布侵犯濟咙聶拉木等處雖離後藏稍遠究  
係西藏地界且有唐古忒番民居住設立第巴經管及詢  
之該噶布倫等均不知該處地形復查詢戴綱等亦僉稱  
從未到過以此類推可見歷來無人經理之明驗請嗣後  
飭令噶布倫等四人內每年輪派一人於春秋農隙之時  
親往各處巡查一次遇有番民事務隨處查辦如第巴等  
或有貪苛不法之事即行稟明革究另選妥人更換如此



定以巡查之例則地方一切情形皆可周知即有不肖之第巴頭人亦不敢任性妄為實與藏地大有裨益

一駐藏大臣應同居一處遇事商同辦理以期公務有裨也查前奉 諭旨令臣等辦理善後之事將駐藏大臣

二人仍前居住一處核定奏聞仰見

睿慮精詳位置

極為允當且等恭繹

聖諭從前駐藏大臣二人原係

同居一處自珠爾瑪特納木扎勒滋事以後將伊之房屋入官該大臣等始行分駐兩處實於辦理公事未為周妥查前藏之撒移珠康撒爾住房即係從前珠爾瑪特納木扎勒舊居足敷二人分駐且同居一處凡有公事即可隨時商辦尤為慎密而於管束家人跟役互相稽查均屬有益且舒濂普福現即同居撒移珠康撒爾院內諸事和衷妥辦嗣後駐藏大臣均應欽遵 諭旨同住毋許私相

遷移倘日久再有分駐者一經查出即行究治。

一西藏貿易外番應著噶布倫等公舉妥實第巴協同該處派來頭目善為撫馭以備稽查也查西藏市集多係卡契番回並巴布之人向來貿易傭工任聽往來從不加以考查該處雖派有頭人在藏管束而番夷雜處奸良莫辨藏地之人又復性情貪鄙往往逢克則懼遇軟則欺如巴勒布在藏傭工貿易之人竟有被已故噶布倫索諾木望扎納勒取強買情事自宜專委妥人協同經管庶可永久相安臣等欽遵節奉諭旨督同衆噶布倫悉心籌酌應請嗣後選老成第巴一人協同該處派來頭目專管卡契回民暨巴勒布二項平日善為撫馭不許互相欺壓有崔角爭競之事即便秉公調處並於年底將外番在藏去來人數密為查報仍責令噶布倫等隨時訪察倘有第巴

頭人等官弁兵役倚勢勒買苦累外番者即據實回稟駐藏大臣嚴拏究治如此撫馭陰窩稽查則內外番夷均知敬畏可期市集流通無復有欺凌結怨之事矣

一漢番爭訟應酌定條規以昭公慎也查西藏遇有爭訟之事向設有管理刑法頭人番語呼為朗仔所轄凡犯罪者俱照夷例分別重輕罰以金銀牛羊即行減免查唐古忒番人自相構訟原不妨聽其照夷律罰贖完結若事有關係亦當究辦至番人與夷民並外番及西寧等處回民爭訟尤當秉公剖斷方為允當若概交朗仔照本處番例議以罰贖難保無偏護高下情弊或辦理稍有不公必致滋端釀釁是以臣等告知達賴喇嘛暨噶布倫等嗣後除唐古忒番人所犯私罪仍照舊發交朗仔按情法辦外至有關涉漢回外番及別項公罪之事無論大小輕重均令

該朗仔呈報駐藏大臣揀派妥幹文武會同審理秉公剖結存案毋許任意議罰致滋枉縱

一後藏抽收巴勒布稅項應量為酌減毋得任意苛索也查聶拉木濟龍絨峽三處均與巴勒布界連為往來貿易衝衝其抽稅之時非獨藏地為然即藏民營販至彼亦皆按貿抽收現在巴勒布來藏買賣匠工人等亦有該處頭人在藏收取稅銀此夷性惟利是圖不肯絲毫疎漏之情形也邇來販運日多第巴等收稅漸增訪詢巴勒布駁載貨物來藏其抽收稅項竟加至十分之一遂至互相爭執釀成衅端前經臣巴忠將多宗起衅之第巴奏請治罪嗣後往來交易尤當定以規程且等督飭衆噶布倫並查詢巴勒布頭人詳加曉諭西藏為天朝所屬不妨厚施薄斂以後稅項止准減半收取仍令噶布倫等詳出唐

古武及巴勒兩處番字勒碑界所永遠遵循並令駐藏大臣不時留心密加察訪倘有不肖第巴陽奉陰違仍前多取滋事者即行拏究嚴行懲治如此則利有攸往番民皆載馳載驅共沐 聖治寬大之恩於無既矣

一藏地銷售鹽斤應分別高低酌定價值並揀派妥人經理毋使撓假滋弊也查巴勒布地方素不產鹽全賴西藏扎野元登卡擦噶所出鹽斤易回食用其鹽係於山谷砂土之中挖出窮番負行銷並非設有糧店可比而此鹽本不潔淨其中更有撓假朦混者今且等督飭噶布倫等並查詢巴勒布頭人將前項情節逐加開導嗣後發運鹽斤務於小番等挖出之時即交該處第巴查驗成色分別高低酌中定價倘係易換糧食貨物亦須按值定價不許令售者於定數之外故昂其價如該第巴等敢於勒賣勒

買一經查出或被告發即嚴行究治

一臺藏官兵應酌定聽差應役數目以實操防並嚴禁弁兵僱役番婦以肅軍紀也查西藏防兵本為鎮守番地而設理應勤加操練以壯軍容至於各衙門差遣應役之兵亦須酌定數目庶免藉故偷安查駐藏大臣衙門向來挑取官兵應役均無定額若上司衙門使令多兵則將弁以下亦皆從而效尤邊防戍守較之內地營伍尤為要緊不可不限以定制臣等遵 旨公同酌定嗣後駐藏大臣

衙門每處官役字識人等不得過四十名之數遊擊衙門不得過二十名都司不得過十五名守備不得過十名辦理夷情司員筆帖式有經管賞需之責亦應量為添撥司員衙門酌定兵丁八名筆帖式酌定六名千總每員酌定跟役字識兵丁四名把總每員酌定跟役二名糧員衙門

看庫酌定兵丁十名均令按期更換輪班操演如此限以定額則各衙門不致濫行挑取而弁兵無所藉口自必實心習練戍兵可期齊備再駐藏大臣向有差遣官兵赴省製辦賞號之例往返動需數月亦屬有曠操防而不肖官兵每有多索烏拉夾帶貨物以致番民生怨殊有關係查駐藏大臣賞需本可無庸專差赴省製辦請嗣後按年咨明本省總督飭司代為製辦凡遇解餉之便順帶赴藏既省弁兵往返之煩亦不致有誤操防似覺兩有裨益又查藏地僱役番婦之禁久經奉行在案惟是西藏唐古忒番婦向以服役謀生兵民多有僱倩喂馬樵汲之事相習成風究非體制臣等復又嚴行出示禁止並令該管將備時刻稽查倘兵丁內仍敢僱役番婦定即革退重責示懲以除陋習

一噶布倫載綱暨第巴等缺應宜慎選承充以資治理而重地方也臣等欽遵 諭旨今將西藏大小第巴之缺仿照回部補放大小伯克之例辦理仰見 聖明指示盡善查西藏向設噶布倫四人總理全藏事務其載綱為管理番兵之職第巴為守土之官均關係要請嗣後均著駐藏大臣督同揀選商之達賴喇嘛酌定 奏補必須端正勤能明白曉事者方充斯任並查出缺之子弟中果係誠實勤安之人方准補放若其子弟年幼無能亦當令其學習然後酌補不便因伊父兄稍有根基遽令承充以致誤事今日舒濂普福惟有倍加公慎會同達賴喇嘛虛衷衡量總期與情允協取具衆噶布倫暨各戴綱等悅服保結存案仍留心查訪如有徂於安逸勤始怠終甚或行止不端貪婪驕縱立即革退懲治另為揀補



一駐藏理藩院司員專司藏地番務駐藏遊擊亦係三品大員應請給予關防以昭信守也查西藏由理藩院派來司員承辦達木額魯特及三十九族番子事務其遊擊統領弁兵五六百名駐藏惟自派設以來向未議給關防凡遇行調催徵支領若無印信難以取憑可否仰懇 聖

恩 勅部鑄給辦理西藏番務章京關防一顆駐藏遊擊關防一顆俾呼應較靈於一切緩急公務實有裨益一噶齊喀爾新設戴綱其缺甚為緊要請援例賞給號紙以專責成也查宗喀濟龍聶拉木等處遠在噶齊喀爾數百里以外地處極邊為巴勒布往來門戶其收稅行鹽等事均關緊要必須安人經理方免弊端除現飭令噶布倫等揀派妥幹第巴三人分頭安設又選老成能事戴綱駐噶齊喀爾地方統轄宗喀濟龍聶拉木三處令其就近稽

查第思統轄該三處之戴綢一缺較他處實為繁重從前  
西藏阿哩地方之第巴因缺分緊要經 欽差大臣班

第 奏准由部頒給號紙承領收執在案今噶魯喀爾戴  
綢經理邊防尤為要任應請照阿哩第巴之例由部發給  
號紙以專責成該戴綢三年之內如果勤慎辦公邊防安  
貼由駐藏大臣加以獎勵俟有噶布倫出缺即行 奏請  
陞補以示優異倘敢疎懈廢弛立即革退治罪如此責成  
既專邊疆可期永靖矣

一請酌添賞需策勵各兵以昭激勸也查西藏向有賞需  
一項係蒙 皇上軫念達木官兵素無錢糧令將三十  
九族每年所交例馬銀三百九十餘兩買辦緞疋烟茶銀  
牌按年獎賞達木官兵一次之用此外再無別款今既議  
添設唐古忒番兵按期操演而駐藏大臣每年應親歷巡

查雖養廉豐厚自當獎賞究不能遍示鼓勵若不量其優劣多為獎勸不足以興番衆鼓舞之心合無仰懇 聖恩於原有例賞達木官兵銀兩之外再於川省開款內每年加給銀五百兩交與總督衙門飭辦緞布烟茶銀牌等項遇便搭解赴藏隨時賞用以廣 皇仁仍將如何分

賞之處據實造冊按年咨送總督衙門咨部查核

一東西臺站應畫分內外經理以速公務也查自打箭爐出口以至西藏一切事務向歸駐藏大臣管理查裡塘巴塘與川省較近而駐西藏遠隔數千里之遙遇事往返批行實屬鞭長莫及況巴裡二塘皆有土司管理原非西藏所屬似應就近畫分綜理俾免耽延臣等酌議嗣後自南墩迤西一路凡屬西藏所管之地遇有大小事件仍照舊歸駐藏大臣管理東土司所管地方事務均歸川省將軍

提督衙門就近備辦至江卡乍丁察木多並移駐後藏各營汛臺站官兵統歸駐藏大臣總理其巴裡二塘安設塘汛官兵就近歸川省阜和協副將兼轄此後凡有地方事件在南墩以西者稟報駐藏大臣聽候核辦在南墩以東者由打箭爐文武稟報川省將軍提督衙門核辦如此各有攸司則內外皆得隨時整飭軍務咸歸安速矣

一派駐藏文武官員三年期滿請援兩金川屯員邊俸之例量予陞擢用示鼓勵其挨班官兵應揀派幹練之人以重地方也查自打箭爐出口以至西藏向於川省文職內派委州縣丞倅分管裡塘巴塘察木多拉里前藏糧餉事務武職派撥遊擊都司守備千把帶兵分駐巡防均按三年一次更換向未定有邊俸陞遷之例在在冰山雪徑路繞羊腸且有彈壓番民巡防夾壩之責該文武等官連役

三年往返幾及四年其中不乏撫馭有方任勞出力之人  
向來期滿回任並無保題陞遷之途似於鼓勵之道不無  
稍缺伏查兩金川營屯各員三年報滿仰蒙 聖恩均

准保 題陞用是以人知踴躍而松潘及打箭爐沿邊各  
缺亦有五年推陞之例今西藏臺站文武各官奉差遠戍  
程途什倍金川地方更為寒苦且經理尤關緊要若不量  
予陞遷未免向隅合無仰懇 皇上天恩嗣後駐防臺

藏文武等官請照金川營屯果能撫輯番衆勤慎操防急  
公任事者亦當循例於三年期滿更換回任時由駐藏大  
臣出具考語 奏明咨送本省將軍提督考察准予保  
題照邊俸報滿之例一體陞用其循分供職者照舊撤回  
本任倘有懈於操防廢弛不職甚或縱令兵役滋擾苦累  
番民者即行叅辦以昭炯戒至把總外委微末員弁如有

勤慎出力者亦須酌量超拔怠玩者隨時責革如此明立  
勸懲則凡有志向上之員自必情殷報効奮勉爭先而文  
武同心協力共相整飭洵於臺藏邊防均有裨益以上整  
飭西藏防守各款臣等遵 旨悉心籌酌逐一告知達  
賴喇嘛班禪額爾德尼極為感激除俟 聖明訓示到  
日欽遵繕寫番文譯諭衆噶布倫及戴綱第巴人等一體  
知悉各令恪遵現定章程妥為經理外臣舒源普福等更  
當隨時隨事實心整飭常以攘外安內為念以仰副  
皇上天下一家永安藏地之至意

籌議運銅事宜疏 乾隆五十六年

鄂輝

四川總督臣鄂輝跪 奏為遵 旨籌議銅運事宜仰

祈 聖鑒事竊臣前奉 上諭以滇省辦運京銅程

途遙遠令臣於銅船到境時派委勤幹道員照料押運出

境並令籌定章程妥議具奏臣隨將派委道府護送緣由  
先行恭摺覆奏在案伏查銅鉛運京水程幾及萬里而  
川省為首先登舟之地辦理尤宜詳慎惟川江水勢與長  
江運河情形迥別從前立定章程於催趲防護各事宜肅  
已至周且密無可再議但於川江行走之處尚未籌及銅  
鉛兩運攸關京局鼓鑄自當精益求精以期悉就安穩臣  
叨蒙 聖恩畀以總督重任並於奏報京運事宜業內  
屢奉 硃批諄諄訓示敢不竭力駑駘用冀運行無誤  
茲半年以來廣諮博採體訪輿情並令沿江道府各行所  
見條議具陳復與司道等再三酌議內有應行酌定者數  
條為 聖主陳之

一銅鉛船隻宜酌減裝運以期穩妥也查向例裝載銅鉛  
每夾舢船一隻以七萬觔為率蓋恐裝載過少反啟船戶

人等私裝貨物之弊是以足其受載以杜私裝但查重慶下宜昌寸節皆灘船隻一到灘口波翻浪激疾若飛鳥銅鉛船隻體質較重轉掉未免欠靈稍有毫釐之差即難免碰觸之患應請嗣後每夾船一隻減裝銅鉛五萬觔並飭經過地方官協同運員嚴查船戶毋許違例夾帶私貨庶受載稍輕轉掉無虞笨滯即舵水人等亦易為力而每運不過添船四五隻所需水脚無多各運員稽查照料均不致掣肘於京運銅鉛不無裨益至一入長江並無灘險到換載時應仍以七萬觔為限毋庸酌減

一銅鉛船隻宜另定開行月分也查每年滇銅八運黔鉛四運向定每年於八九十一十二正二三八個月按起開行其四五六七等四月不在開行之限蓋因盛夏秋初江水泛漲駭浪驚濤望如鼎沸是以停其開運殊不知臘



底春初水勢枯落各灘盡現嵯峨怪石布滿江心屈曲盤旋險礙不異泛漲之候查向來川中重載客船每屆臘正兩月拉緯上游沿邊行走者居多其由江心大溜放流直下者甚少蓋惟恐冒險開行難保不無損失惟銅鉛攸關京局鼓鑄各運員等迫於例限恭嚴不得不勉強行走是于民船不敢開行之際反使京運船隻冒險放流殊非慎重京運之道應請嗣後銅鉛船隻每年春夏在二三四五月初秋冬八九十一等月按八個月放行其六七十二正月俱停其開運並咨明雲貴督撫飭令運員預為料理查照月分按起如期到川領運前進如此避險就夷庶銅鉛可無失利之事

一攬造船隻之戶宜令官為驗充也查川江重載大船只能順流而下不能逆挽上行是以每運銅鉛到川有一種

包造船隻之人名曰攬頭又名板主向運員預領腳價造船應載前於四十八年間經督臣李世傑奏明接到滇黔京運來咨即札行江北廳令其傳知攬頭預將船隻造就聽運員到來雇用等因經部議奏准在案惟是重慶一帶向無船行此等攬頭散處河干雖屬江北同知管束並未取造花名存案與別省設有行戶者不同其船隻造成後更有奸滑攬頭利銀兩可以預領迎赴前途自向運員營求包攬是雖有江北同知傳知飭造之名其實各運員已自行預先雇定辦理似未周到應請嗣後飭行江北同知在於各攬頭中慎選殷實老成之人令其承充並取具保結造具花名文冊呈報藩司川東道衙門備查一得京運起程之信即於此款人中挨次派令造船承值造完之日令江北同知就近察驗如有板薄釘稀即將攬頭責處並

飭其另行改造其頭舵水手亦責令按船配雇如有疎失查造定例追出原領腳價將頭舵攬頭松示河干永不許再行攬頭並將船隻變價以充撈費其攬頭舵水姓名亦造冊移送運員查考倘運員到川或有私用冊內無名之攬頭舵行包攬承載許江北同知查明具報聽候核辦如此明立章程庶攬頭不敢私自包攬於銅船更為有益一各處灘宜設立灘師幫同放運也查川江各灘水勢情形各有不同惟熟于該處水性之人方能隨時知其平險工於避就銅鉛船隻所募頭舵人等雖係往來經歷老于操舟究不若本地土著專於一處者尤為諳習應請仿照救生船之例於報部各險灘處所酌募灘師四五名按所在州縣捐給工食令其常川在灘專放銅鉛船隻如果過灘安穩聽運員量加犒賞以示鼓勵如有失事即將該灘

師革退卹示河干以昭炯戒仍令各地方官將境內險灘應行添設灘師之處及灘師姓名造冊報查

一打撈沉溺銅鉛應明立水摸賞罰以示懲勸也查銅鉛船隻失事例應報明地方文武勘詳一面多雇水摸設法打撈以冀全獲但運員不能親身守候不能摘留家人在彼監視而地方官員又因事屬他人不肯懸立重賞鼓勵衆心以致撈獲寥寥且恐不肖水摸心存覬覦捏報水深石利無從立足以為偷摸地步應請嗣後如遇銅船失事即雇備水摸揀量水勢設法打撈並於水摸中揀選誠實一人點為水摸頭專司督率如能一月內全獲者於例給工價外著令該地方官賞給銀五十兩限外十日或半月內全獲者以次遞減所賞銀兩臣即捐廉發還三月內全獲者毋庸獎賞倘限內稀少撈獲或逾限不及一半者即

將水摸頭嚴行比責枷示河干如有捏報偷摸獎賞加倍  
治罪庶沉溺銅鉛可期多獲並可杜水摸偷撈之弊以上  
各條謹就 臣體訪所及並參酌地方實在情形固不敢妄  
議更張亦不因循拘泥謹據實奏

聞

皇清奏議卷六十七

皇清奏議卷六十八

分別武員考校疏

乾隆五十六年

福康安

協辦大學士兩廣總督臣福康安謹

奏為遵

旨酌

議分別武員考校章程仰祈

聖鑒事竊照臣接准部

咨軍機大臣阿桂等議奏浙江提督陳杰奏浙省弁兵艱

於考校不能得人一摺應請

勅下兩江湖廣兩廣陝

甘雲貴及福建各該督咨會該提督如何就近考拔之處

各行具奏到日再行細心核擬以歸畫一遵行知到臣

伏思國家設官分職文武並重行伍為儲才之地末弁

有進身之階校拔公明戎行自飭前蒙

皇上勅令廷

臣議給武員養廉更定品秩並荷

聖念弁員等官卑

祿薄資斧維艱令俟陞至守備到任三年後方行送部引

見

鴻恩優渥無以復加茲復

勅令各省總

督籌議就近考拔弁兵以節勞費

聖慈體恤尤為入

細入微自宜欽遵辦理查廣東廣西兩省水陸營制棋布  
星羅額缺多於他省各鎮協考拔千總外委及額外外委  
向來遇有缺出俱由該營將領遴選合例弁目呈送提督  
考驗給咨轉送臣衙門覆考遞行拔補分別咨部給委赴  
營任事臣自蒞粵以來于考拔一事加意慎重每一出缺  
先儘出師打仗奮勇之人次儘捕盜出力著有勞績者予  
以拔補如無此項人員則以年分之先後察看才力之優  
絀按次量拔俾弁兵等知所激勵無如該鎮將等未能盡  
絕情面一秉至公上年有總兵葉至剛徇情濫送兵丁呂  
夢之事經臣專摺奏 奏治罪嗣是各鎮協營俱知秉公  
甄拔不敢稍有瞻徇惟是舊制相沿遵行日久而於弁兵  
赴考維艱宜酌分遠近之處未經詳悉剖議今浙江提臣

陳杰以兩省缺出必需親赴督臣考驗往來跋涉盤費艱  
難奏請酌量辦理經軍機大臣遵旨飭令妥議具  
奏遵即移行查議茲准據兩省提督暨藩司查明議覆前  
次臣復將各營與廣東省城並提臣駐劄地方道里途程  
確加校核悉心籌議查綠營千把外委額外外委俱有巡  
防操練之責而千把二項其職分較大食廩較優如果人  
才出衆將來可備都守之選似無庸慮其赴考艱難議更  
舊制在省水陸提督總統戎行受恩深重且俱係

皇上深知擢用之人凡遇考拔千把自能秉公持正不  
致徇私營私但千把之與都守官階相近若竟由提督考  
拔而總督並未閱其人材技藝似不足以昭慎重且各營  
陞拔千把例由本管鎮將考送倘所舉偶有不公提督若  
顧情面不行駁飭則適足以啟倥倖之端即使總督巡閱



時復行考驗查出已難保無貽誤營伍應請嗣後粵東西  
兩省各營千總把總缺出俱仍照舊例由該營呈送提臣  
考驗轉送督臣覆考拔補至綠營外委及額外外委協同  
千把辦事並備差遣之用均由兵丁以次考拔職分較小  
與文職中雜職相等且外委養廉甚微額外外委例無養  
廉所得餉銀亦屬無幾長途赴考資斧艱難恐其憚於遠  
涉反足隳其上進之志自應酌量程途遠近各歸就近衙  
門考拔以示體恤臣查廣東營伍除臣標五營肇慶水師  
營外如左翼右翼高州雷瓊四鎮屬協營及不隸轄之廣  
州肇慶二協三水四會理雅海防增城新塘永靖七營各  
分駐地方距廣川省城較近嗣後遇有外委額外外委缺  
出應請仍由該鎮及各營將領揀選呈送督臣考校其提  
標五營潮州碣石南澳三鎮及不隸鎮轄之惠州一協和

平大鵬平海三營距省城較遠而與提臣所駐之惠州較近嗣後外委等項缺出應請改由各鎮營就近選送提臣考拔仍咨明督臣衙門轉咨達部分別請劄駐冊至廣西各省營內惟梧州協懷集營二處離臣駐劄地方稍近然亦有八九百里此外均與提臣所駐柳州程途較近所有考拔外委額外外委弁缺應請統由提臣拔補仍移咨督臣衙門覆核咨部以歸畫一如此分別考選庶微末員弁不致以跋涉為艱而於汛守操防亦無憲曠日貽誤矣惟是輿情固宜體恤而考察亦應從嚴請嗣後凡遇督臣巡閱營伍或因公經由之便各該營將提臣新拔之外委等員就近呈送赴考如有弓馬軟弱材技不堪之人即行斥革辦理其提臣經過地方亦將督臣所拔之員一體考送彼此互相較閱該弁員知有層層考核自必顧惜功名認

真操練於造就人材之道似為有益且惟有嚴加甄覈實心教督大小員弁悉成勁旅以仰副我皇上整頓營伍恩施無已之至意

籌巡哨以靖海島疏

乾隆五十七年

郭世勲

廣東巡撫臣郭世勲謹奏為確查瀾洲海島情形並籌辦巡哨事宜據實具奏仰祈聖訓事竊照督臣福康安具奏請查海島房寮業內聲明遂溪縣屬之瀾洲海島孤峙外洋易滋奸宄請酌撥守備千總外委等員並兵三百名移駐該處以資巡守其應設砲臺汛房戰船等項俟准部覆另行題咨辦理嗣准部覆行令勘估核議具題等因各在案當經督臣福康安會同臣札飭該處鎮道府縣詳加查勘具覆去後緣瀾洲孤峙海中其地雖在雷州府屬洋面而實介雷瓊廉三郡洋海之間距海安海口

龍門各協營海口二三百里不等因其地居險僻洋匪間有潛赴汲取淡水燂洗船隻若於此處移駐弁兵匪船不能泊近且可截蹕追擒於洋面形勢實為扼要但移駐之始必須通盤籌畫層層周妥方可一勞永逸若體察不真則日後仍多掣肘是以福康安在粵時節據該處鎮道府縣查勘稟覆非情形未確即籌議未周疊次會臣駁查惟期萬方妥善正在辦理間福康安欽奉

諭旨進京瀕

行囑臣再加確勘務期周匝方可具題不必以原奏移駐在先稍存遷就臣署督篆又復疊檄催勘茲據雷瓊鎮蒼保雷瓊道俞廷垣雷州府知府馮靖前署遂溪縣知縣孫樹新先後具稟潤洲四面大洋時有颶風猝發飛沙走石猛烈非常前沿海民人潛赴樵採零星搭蓋草寮每被風暴掀揭今若建蓋兵房則海風震撼難保經久且四面

俱係礁石隨潮伏現海外沙沱又復冲刷無定不但一遇  
暴風戰艦難以灣泊即海潮退落之後失礁鱗列停泊亦  
多窒礙而淡水又止有一處源短流細不足供多人食用  
其中雖有可墾地土岸田刈除草礫只可種植雜糧水田  
須建築基墾以禦風潮墾築均需時日若兵丁在彼駐防  
即須運米接濟重洋險阻輸載均費周章該島又不產竹  
木春夏只生茅草過此更無可消炊爨察看情形據實稟  
覆並繪圖稟繳前來且恐該鎮道等以事關創始心存畏  
難或地涉海洋查辦草率又復遍訪衆論博考輿圖該島  
情形實係如此伏思 國家設兵置汛在乎因地制宜如  
米澗洲地方柴薪田畝足可耕採淡水足供汛用戰船便  
於灣泊砲臺汛房無虞颶風吹刮則此處屹立一營添設  
兵防全洋聲勢倍壯即使營繁工鉅亦當據實奏請動

部辦理決不敢意存節者猶事因循今經福康安與臣恩  
次飭查該處竄難駐兵防守印未便因有前奏輕率辦理  
以致將來掣肘貽誤惟是不設兵防雖屬難行而巡哨必  
加周密查乾隆三十一年前督臣楊廷珍查看閩洲情形  
亦以設汛未便責成該管之海安營及附近之龍門協每  
月會帶兵船赴閩洲巡哨久經咨部通行在案但前議並  
未定巡兵額數備弁亦未有責成各協營視行奉行故事  
巡防疎懈勢不能免今臣酌量情形閩洲無庸專設汛防  
添置兵額查海安營額設兵八百二十六名龍門協額設  
兵八百九十六名足數抽撥請備照福康安原奏撥兵三  
百名之數即於海安龍門兩協營水師中每營撥派兵一  
百五十名每月責成龍門協副將海安營遊擊飭令千把  
外委各一員帶兵各七十五名配駕哨船會赴閩洲梭織

汛巡具結聯銜通報下月仍由各協營先期撥派更番出巡並令各該副將遊擊嚴密督察如能拿獲盜匪多名即奏請分別陞賞如或得洩偷安及有失事之虞或盜匪私赴潤洲潛行燬船汲水即將管駕之員弁兵丁及該管副將遊擊一併分別叅處其潤洲東南斜陽一島與潤洲相去僅三四十里一體責令各弁兵順帶巡查以昭慎密如此則無駐兵設汛之名而有緝盜巡洋之實辦理似為周妥臣因海疆捕務緊要疊次飭查今始得有確見是以辦理稍遲是否如斯伏候 聖明訓示

請嚴隣境緝捕疏 乾隆五十八年

祝雲林

掌陝西道監察御史臣祝雲林跪 奏為請嚴隣境緝捕責成以杜規避以靖匪徒事竊臣見近日浙江巡撫長麟叅奏該省石板殿被盜文武員弁控報匿票一案又山東

巡撫吉慶奏江南山東會勘黑水洋面互相推諉一案均奉 旨嚴辦在案凡地方之有責者自必咸知儆惕

各思振奮惟是隣近省分壤地交錯所在多有如果互相防範則合兩境之力以辦一隅之事應較專管地面更為周密詎地方心存吟域平時既不協力稽查遇事則互相推諉惟冀不在所轄境內即可置身局外不思往返查勘動需時日匪徒因得遠颺所以狡黠之徒往往於壤接境連之區肆其出沒如黑水洋於五十二三等年被劫五案距今六七年之久犯未弋獲而江南山東尚復爭論界址其明徵也伏見我 皇上整飭官方凡遇地方緊要重案人犯屢獲隣境要犯者無不從優鼓勵予以引 見頻加擢用實屬 仁至義盡乃地方官仍不免總總以界址為辭推原其故則以本境責在承緝隣省不過協緝



責成不專竟可視為海捕具文章而獲犯且可仰邀優叙此所以咫尺之地出此入彼必須爭執況海洋一帶若為傍岸猶有道里可稽如係洋面則浩渺無涯風浪所逐難辨程途就令失事者重往誠認亦難確指處所最易起爭執之端豈可因界址未明竟將重案懸宕且愚以為凡屬兩境毗連之地除尋常案犯仍專歸本省辦理外其有海洋盜劫重案界處兩省者即將兩境員弁一體為承緝呈報立即互相咨照會同截拏該督撫仍各派鎮道大員親往督辦如有觀望不力者即行指名嚴叅如此則接連境界承緝之責彼此如一推諉之習無所復施不惟兩省堵截獲犯較易平時亦必協力同心互相防範匪徒不敢覬覦海洋盜就寧謐矣

酌議藏內善後章程疏 乾隆五十八年 阿桂

大學士臣阿桂謹 奏為遵 旨會議具奏事福康安

等奏藏內善後事宜前次酌議各條外尚有應行辦理章程一摺乾隆五十八年正月十七日奉 硃批軍機大

臣會同大學士九卿詳議具奏欽此臣等謹就各條逐一悉心酌議分列於後

一福康安等奏達賴喇嘛班禪額爾德尼與外番通信應告知駐藏大臣詳加商酌一款查西藏地方與廓爾喀布魯克巴哲孟雄宗木等處部落皆係接壤向來外番人等或來藏布施或講論事略達賴喇嘛發給書信原無禁例但相沿日久毫無稽察甚至衛藏地方緊要事務亦並不關白駐藏大臣輒私行往來通信彼此闕說弊竇叢生即如廓爾喀上次滋事之前曾寄信與達賴喇嘛講論錢糧辦理不能妥協致使藉詞尋衅曾經節奉 旨飭諭令

福康安等奏稱將來廓爾喀遇有稟請之事均應由駐藏大臣主持與達賴喇嘛會同商辦即商人來藏於達賴喇嘛班禪額爾德尼前呈送土物謝過亦應令駐藏大臣代為酌定回謝方可給發平日如有關係地方事件及通問布施書信均應報明駐藏大臣聽候辦理等語既可措詞得體又可隨時稽查實與體制相協至布魯克巴素信紅教每年遣人來藏向達賴喇嘛等呈遞布施哲孟雄宗木落數達等小部落如差人來藏布施通問亦應立法稽查以昭體制嗣後各外番部落差人來藏者均應如福康安等所奏由邊界營官查明人數稟明駐藏大臣驗放進口並令江孜定日駐劄備員實力稽查其到藏瞻後所有各該部落稟達駐藏大臣者由駐藏大臣給諭其呈達賴喇嘛等稟帖俱應呈送駐藏大臣譯出查驗由駐藏大臣與

達賴喇嘛將諭酌定發給查照人數再行遣回其噶布倫  
雖係達賴喇嘛管事之人不准與各部落私行通信即各  
部落有寄信噶布倫者亦令呈送駐藏大臣與達賴喇嘛  
商同給諭仍不准與各噶布倫等私行發信倘有往來暗  
通信息之事駐藏大臣即將噶布倫革退以示懲儆庶內  
外之防益昭嚴密

一福康安等奏各處邊境均應設立鄂博以清疆界一款  
查西藏邊界如濟咙聶拉木絨轄等處向無界址各該處  
均與廓爾喀道路相通前經奉 旨凡係藏地邊界各  
處均應設立鄂博釐定清楚以期永為限界該部落不准  
私自偷越實為先事預防之良法今福康安等奏稱於濟  
咙外之熱索橋聶拉木外扎木地方之鐵索橋絨轄等處  
俱已設立鄂博釐成疆域等語俱係欽遵 諭旨辦理

周安將來已勒布貿易之人及邊界唐古忒番民零星負販自必各按本界不致私相往來邊境自可永臻寧謐仍令駐藏大臣於巡視之便認真查察所立鄂博隨時堆砌石塊不得日久懈弛致有偷越

一福康安等奏邊界營官揀選妥幹之人補放並應照內地地方邊俸之例酌定年限陞擢一款查前後藏添設換防同知州縣縣丞等官監造銀錢支放番兵口糧前據福康安等於善後章程奏明定有考核以專責成立法極為周妥至邊界地方與外番接壤約束番民稽查出入最關緊要必須精明強幹之人方足勝任向來俱用庸番充補以致任意僉委有心苛刻種種辦理均未允協今據福康安等奏稱邊界地方向來稍能辦事營官因該處氣候惡劣冰雪較早皆願在前藏當差率將閒冗無能者濫行派往

以致辦理諸事每多滋弊嗣後補放邊缺營官於小缺營官及管兵之甲俸番目內擇其幹練者調補如果到任三年辦理妥善駕馭得宜即行更換調回記名以古瑋等缺陞用如有辦理不善之處立即革退等語係為策勵番目防杜滋弊起見應如所奏嗣後補放邊缺營官即照此從公甄拔以示勸懲不得稍有姑容如此黜陟嚴明番目自必各知奮勉而邊隅亦可永資綏靖矣

一福康安等奏嚴禁襲充番目之弊以勵人材一款查西藏世家子弟稱為東科爾凡遇大小番目必於東科爾中通曉書算家道殷實者充補其餘番民中雖有妥辦之人並無進身之路而或挑補定珠小頭目亦不能再有陞轉前在藏內兩次滋事皆由達賴喇嘛任聽左右近傳親族及噶布倫專擅率意徑行不告知駐藏大臣與達賴喇嘛

以致滋生事端節經奉有

諭旨遇有噶布倫等缺出

令駐藏大臣與達賴喇嘛秉公揀選惟視其才具之優長不在世族家道之貧富

聖諭周詳無微不至今據福

康安等奏稱查核東科爾子弟不下數千人勢難一時更改舊制前已酌定章程如充當兵丁之番民果能奮勉出力技藝嫻熟即非東科爾出身亦准由定珠游擢陞至古琿其餘辦事之番目即於東科爾內擇其端詳歷練之人按等補用但不准襲充伊祖父職分以致冒濫即挑取小中譯噶厦卓尼爾小缺營官等番目亦必須年至十八歲以上方准當差不得以幼小之人應名充數等語是於變通之中仍寓甄別之意應如所奏辦理嗣後應令駐藏大臣隨時查察不得任聽達賴喇嘛相沿積習仍以門第相高彼此援引躐等超遷致滋濫冒之弊

一福康安等奏各寺坐床堪布應令達賴喇嘛會同駐藏大臣秉公補放一款查堪布係一寺首領必須熟悉經典人品端方始可領袖衆僧如該喇嘛等因貪利益輕務營求以致補放不得其人殊非秉公遴選之道今據福康安等奏稱大寺堪布爲人信奉可得布施寺內莊田歸其管理皆思營求所放不盡能公嗣後凡有大寺坐床堪布缺出達賴喇嘛應知會駐藏大臣濟咙呼圖克圖公同揀放等語應如所請藏內小寺堪布喇嘛仍令達賴喇嘛自行補放遇有大寺坐床堪布缺出務須令達賴喇嘛會同駐藏大臣濟咙呼圖克圖妥爲揀擇給予會印執照派往住持以昭慎重則領袖可以得人而揀選益歸至公矣

一福康安等奏商上銀錢出入應照新定數目畫一收放一款查藏內商上向不鑄錢專賴廓爾喀運來易換因成



色較高遂爾抬價居奇致有爭執嗣據福康安等奏明商  
上准其鑄造銀錢統用紋銀成造不得絲毫撓雜通行使  
用臣等會議 奏准並令繪模式令用漢字唐古忒字於  
正面背面分鑄乾隆寶藏字樣以昭同軌同文之盛今據  
福康安等奏稱現在定議要紋銀一兩易換新鑄銀錢六  
圓易換商上舊鑄錢文及巴勒布舊錢八圓詢之商民人  
等悉皆稱便等語是商上所鑄之錢與廓爾喀之錢同係  
紋銀彼此無所藉口廓爾喀亦無所居奇自可通行永遠  
惟查番寨租賦有以銀錢折交物件者若商上收納不公  
勢必苦累番民應如福康安等所奏嗣後商上收納銀錢  
數目及採買各物俱照所定兌換之數按照新鑄舊鑄分  
別折收辦理庶貨幣流通可期經久無弊仍令駐藏大臣  
隨時稽查商上公平收放不得稍有浮多倘有查出輕入

重出之弊即行奏明查辦並將商上另行揀選更換以絕弊端而昭公允

一福康安等奏濟龍聶拉木邊界納收稅課無庸酌減一款據稱濟龍聶拉木納收稅課無多向定例凡巴勒布商民運米在邊界售賣者每米一包抽取一木碗每年約收稅米一百數十石俱運交大昭以備得昭念經之周唐古忒番民零星販出邊界鹽觔每包亦抽收一木碗該營官將所收鹽觔向巴勒布商人易換製辦藏番之香料及紙張藥品等物運交商上至巴勒布商民販運來藏各物除米石外其餘並不在邊界納稅祇由該營官記明報數稟知商上貨物到藏不論粗細每包止納銀錢一圓即金花緞疋珊瑚珠子蜜蠟細軟之物皆係按包納稅惟紅花不計包數每先納銀錢一圓詳核所收稅課為數有限日久

相安並無爭論今既准通市所有抽收稅課一項未使將往例議減應請照舊辦理等語查廓爾喀與唐古忒互相貿易彼此牟利易起爭端先經奉

旨應行停止嗣因

廓爾喀地方需用食鹽酥油等項斷不可缺又奉

諭

旨或於一歲中酌定次數官為辦理嗣又因貿易一事日久究不能無獎復奉

諭旨令福康安等毋庸議及必

不得已當候廓爾喀再四求通交易時再為酌定次數辦理前據福康安等奏請查明貿易番回往來出入應行造具名冊給照稽查並無須派員經理各摺內均經臣等會議請候福康安等接奉續降

諭旨覆奏到日再行核

議在案是貿易一事尚未議定所有此次福康安等所奏濟龍聶拉木照舊抽收稅課亦應統候福康安等將貿易應否酌以次數定議覆奏到日臣等再行一併核辦

一福康安等奏嚴禁私給免差照票以均徭役一款查藏  
內各寨番衆供應烏拉人夫牛馬本為急公起見向來達  
賴喇嘛班禪額爾德尼及用事親族並大呼圖克圖等往  
往聽受富戶大族懇求囑托即給予免差照票又噶布倫  
戴琿及大喇嘛所管之莊田人戶每多懇求牌票或免差  
徭或免稅賦苦樂不均實未公允節經奉 旨令糧員

等務須平給價值設法招徠是以該處番民踴躍從事其  
從前番衆藉有照票規避不前最屬疲玩積習經福康安  
等嚴加查禁誠如 聖諭為第一要務所請將各處免  
差照票概行撤銷務使徭役均平不得專派窮番致滋苦  
累如實有勞績者今達賴喇嘛告知駐藏大臣方准給票  
之處均應如所奏辦理至番民之批定額兵者仍應由駐  
藏大臣及達賴喇嘛於挑兵時發給照票填寫住址名字

免其門戶差事如有事故革退即將原票繳銷該兵等既可專心操演亦可杜藉端規避之弊

一福康安等奏衛莊僧俗戶口應行造冊稽查一款查衛莊各寨地方雖統於達賴喇嘛而各呼圖克圖堪布喇嘛營官第巴等官多係各食其地是以戶口之增減人民之去留達賴喇嘛無從稽核駐藏大臣更難過問而於各部落有無私來衛藏潛匿之人亦無由得其踪跡辦理本未周密今據福康安等奏稱藏內人衆往來踪跡靡定曾奉有諭旨令駐藏大臣給與路票應請令達賴喇嘛將所管大小廟宇內喇嘛名數開造清冊並令噶布倫將衛藏所管地方及呼圖克圖等所管寨落人戶一體造具花名清冊於駐藏大臣衙門及達賴喇嘛處各存一分以備稽查等語應如所請嗣後務須開造清冊實力稽查設有

未銷路票私行往來者一經查出將該管之番目等從嚴究治庶立法既備而匪類潛踪之弊可以永杜矣

一福康安等奏蒙古延請喇嘛誦經應由駐藏大臣給照前往以資查考一款查青海蒙古王公等差人赴藏延請通習經典喇嘛赴該游牧地方誦經教經原屬事所常有但必須西寧辦事大臣行文駐藏大臣彼此關白給有執照方可以資查考而杜私越今據福康安等奏稱向有稟知駐藏大臣前往者亦有私行前往者是竟漫無稽察既非體制況由藏前越青海經過三十九族番地即與各外番相通尤不可不嚴定章程以資稽核福康安等奏請嗣後凡遇蒙古王公等延請喇嘛應令西寧辦事大臣行文赴藏再由駐藏大臣給與執照並咨明西寧辦事大臣等語庶彼此各有關會來往時日皆可按照而稽永杜私相

往來之會契應如所奏辦理至所稱前往各外番朝山禮塔喇嘛亦必須稟明駐藏大臣領照方許前往等語查前次福康安等奏拉特納巴都爾呈出原立合同每年唐古忒人前往陽布朝塔抹拭白土一節曾奉 諭旨此事

竟可永遠停止今若准其前往各外番朝山禮塔而獨不准其前赴陽布轉致廓爾喀聞知生疑莫如概不准其前往庶不致稍有歧異所有喇嘛赴各外番朝山禮塔之處應毋庸議

一福康安等奏嚴禁私用烏拉以恤番民一款查達賴喇嘛如有需用烏拉之處從前僅由達賴喇嘛給發牌照並不關白駐藏大臣已屬未為周妥乃近日凡噶布倫戴琿以及從前達賴喇嘛用事族屬竟有私用烏拉之事則供應食用一切多行給取擾累番民皆屬勢所必有殊非仰

體 聖主體恤番民一視同仁之意嗣後應如福康安等所奏喇嘛番回人等私行往來概不得擅用烏拉亦不許私發信票遇有公事差遣須用烏拉之處必須稟明駐藏大臣及達賴喇嘛發給用印牌票標定號數沿途始准應用

一福康安等奏罰贖不公及私行抄沒家產之弊應行嚴禁一款查衛藏地方番俗相沿遇有唐古忒番民爭訟及犯人命竊盜等事多係罰贖減免原不能按照內地律例行罪但仍其舊制亦必須按其罪名之輕重定罰贖之多少今據福康安等奏稱近年以來該管之噶布倫朗仔轄密木等割斷不公意為高下遇有家道殷實之人於議罰本例外加至數倍並不全數歸公侵漁飽蠹又或懷挾私嫌竟將偶犯小過之人捏詞回明達賴喇嘛輒行抄沒家



產請嗣後罰贖多寡按照向來舊例譯寫一本交駐藏大  
臣核擬辦理其查抄家產之例除婪索賍數過多者應回  
明駐藏大臣酌辦外其餘公私罪犯俱令憑公究治嚴禁  
私議查抄等語臣等查該處罰贖之例按罪定罰自應定  
有成書用昭遵守福康安等所稱譯寫舊例一本交駐藏  
大臣衙門存案之處該處所存舊例是否妥協亦應令駐  
藏大臣詳加閱核如有未為妥善之處正可乘此甫定章  
程之時妥為酌改其婪索賍數過多者亦令駐藏大臣悉  
心酌核從重議罰其私行查抄家之處似可永遠革除庶  
該噶布倫等無從捏詞架禍而挾嫌逞私之弊可以不禁  
自息應如福康安等所奏辦理

一福康安等奏西藏官兵所需火藥應就地酌送以節糜  
費一款查上年福康安到藏時原經查明該處工布地方

產礮布達拉現存火藥即係該處配造隨即差弁前往製造 奏明辦理在案今查駐藏官兵每年操演火藥二千餘觔現據福康安等查明工布製造火藥所需價值雖較內地稍昂然以運脚比較則節省至三十餘倍之多是既省運解之勞又可節浩繁之費自應就近製備以歸簡易現在軍需柔內運送火藥已到藏者除軍營用去外尚有餘存已據福康安等派員分貯前後藏高燥地方足供數年操演之用俟現存火藥將次用竣祇敷兩年備用之時再行在藏配造應如所奏辦理至所稱赴工布酌造火藥若由駐藏遊擊派人前往恐致擾累番民並慮有私造偷漏之弊應由駐藏大臣發給印票交噶布倫派誠實番目前往製造解藏等語查遊擊所派之人固不可信而竟交噶布倫差委番目前往亦未必盡能妥協目等酌核嗣後

藏內凡遇應赴工布酌造火藥時應核定每年操演火藥數目由駐藏大臣飭令遊擊選派千總等弁並令噶布倫派誠實番目同往工布地方製造運送赴藏庶可彼此互相稽查或可杜援累透漏之弊至需用鉛丸既據福康安等查明藏地產鉛甚少自應俟軍營存剩鉛丸將次用完時與火繩一體由川省運解應用其所稱軍營用餘弓箭箭留於前後藏撥給官兵換防又進兵時所鑄砲位十三尊撥給後藏二尊令於操演時試演準頭其餘十一尊交布達拉存貯之處應如所奏辦理

一福康安等奏達賴喇嘛賞給噶布倫古琿等房屋莊田不得私行佔據一款查藏內噶布倫古琿由達賴喇嘛撥給房屋原俾養贍身家兼資辦公自應照內地衙署廉俸之例俾現充之人居住管理一經事故出缺即應交代後

任方為允協若噶布倫等據為己有則更換一人又須另撥一分商上房屋莊田有限勢必不敷分撥且非核實辦公之道今據福康安等奏親與濟龍呼圖克圖確切查明凡噶布倫戴琫等應得房屋莊田既有定額則卸任之人無從侵吞冒濫接任之人亦無須另籌撥給實於藏務前途有裨

一福康安等奏商上喇嘛透支錢糧之弊應行禁絕一款查喇嘛等支給錢糧原為隨時奉贍之資自應按期放給既不容稍有冒混亦毋許稍有剋扣方為慎重錢糧體恤僧衆之道若准預期支放不但喇嘛等易滋浮冒朦混之弊即經手之人亦難保無藉端舞弊之處今據福康安等奏向年以來商上支放錢糧每多先期透領嗣後應令按期支食不許絲毫預領應如所奏交濟龍呼圖克圖隨時

查核若因嚴禁預領支放或致短少剋扣即將支放之人查明究治以除積弊以歸核實

一福康安等奏各寨租賦應按年征收清交商上並查明逃亡絕戶隨時豁免以恤番民一款查各寨番民輸納租賦自應照內地征收之例年清年款其有逃亡人戶田畝已經荒廢者亦應查明免征毋致徒滋擾累方足以昭核實而示體恤今據福康安等奏藏地各寨應交租賦物件距藏地較近者係派濟仲第巴往征遠處寨落均由各處營官征收送交商上而不肖之濟仲第巴營官等將收來租賦拖延不交致啟侵漁之弊甚或將本年租賦收清復將明年租賦開征逃亡人戶亦不豁免商民頗形苦累嗣後應令商卓特巴立限嚴催征收之濟仲第巴營官等年清年款不得違限拖延亦不得先一年預征其各寨逃亡

絕戶實在田畝拋荒即將該戶租賦豁免俟有佃種之人  
再行照例陞科等語應如所奏飭令商卓特巴督同濟仲  
第巴營官等妥協辦理隨時稽察使經手征收之人無由  
任意侵蝕而番民等仰戴 皇仁從容輸納得免追呼  
益可永臻樂利

一福康安等奏駐藏大臣衙門應設譯寫廓爾喀番字通  
事人役一款查廓爾喀向化投誠按期入 貢除呈進  
表文外尚有遞呈駐藏大臣稟帖等稟帖須熟諳番語番  
字之人通譯明晰方為妥便前經福康安等於進兵時  
奏明在巴勒布商人中擇其誠樸可信者帶往軍營備譯  
番稟其語悉廓爾喀言語卡邊界番亦酌帶數人作為通  
事傳譯語言俱今互相比對以免舛誤今廓爾喀業已傾  
心歸順重譯來王所有通字譯字人等自宜酌量增設現

據福康安等奏稱駐藏大臣衙門向設譯事房通事一名祇有譯寫唐古忒字之人從不曉通廓爾喀字跡言語即唐古忒番民內亦惟近邊一帶向通廓爾喀言語字跡雖殊尚有兼通之人應請添設認識廓爾喀字跡人役一名通曉廓爾喀言語通事一名並另派唐古忒番民三四名令其學習廓爾喀番語字跡以備將來充補應役等語應如所奏添設俾益昭殊方象觀之盛其所設通事譯字二名需用日給口糧亦應照所請每名日支銀六分四釐三絲九毫照例一體支給以資食用

一福康安等奏廓爾喀貢使往來應酌派文武官員護送一欵查屬國梯航不遠萬里抒誠納貢競赴闕庭廓爾喀以從古未經賓服之區畏威戢德自請五年一貢遣大頭目貢表來京

瞻觀仰蒙

聖恩

允准 王會之隆尤爲史冊所罕觀但該貢使等深歷  
衛藏道路綿長自不可無官員護送俾得行旅胥安今據  
福康安等奏稱每遇貢期今廓爾喀酋長將貢使跟役人  
數由何路進口之處預行稟報駐藏大臣即委糧務文職  
一員會同定日守備親赴邊界點明人數預備烏拉送至  
前藏駐藏大臣酌加賞犒一面奏明一面飛咨四川總  
督差派文武在打箭爐等候貢使自前藏起身即於前藏  
遊擊及前藏糧務內差委一員護送至察木多再令察木  
多遊擊及該處糧務輪派一員接護前進行至打箭爐再  
交四川省選派文武護送赴京等語應如所奏嗣後廓爾  
喀貢使進京駐藏大臣及四川總督均各派委員弁層層  
接替護送遙行其貢使回國亦照此逐段護送以仰副  
聖天子綏懷遠人之至意其藏內官員送至察木多即



可回藏於本任公事亦可無虞貽誤以上各條臣等謹悉心會同公議繕摺具奏是否有當伏乞皇上睿鑒訓示施行

籌海防疏乾隆五十九年

福 寧

山東巡撫臣福寧跪奏為查閱登萊青一帶海口舊制控馭得宜並就現在情形酌籌核實辦理以期益臻寧謐事竊臣前奉諭旨垂詢沿海弭盜事宜仰見皇

上綏靖海洋惠安商旅至意臣業將盜風久已歛息緣由恭摺具奏並聲明於查閱營伍之便順道查看復蒙

聖明批諭訓勉諄諄無微不至嗣臣自省起程先赴青州登州萊州濱海各郡暨武定府屬查閱營伍順道確勘各海口目擊情形參以體訪並與該文武等虛衷籌酌期以安益求安伏查沿海一帶南自江南交界之鶯遊

山北至城隍城島接壤天津海道三千七百餘里東省所轄之處如安東膠州即墨文登等營分設都司副將叅將等員兼轄海口其登州郡城即係總兵駐劄又有水師三營分設遊擊守備三員戰船各四隻均歸登州管轄水陸營汛星羅棋布繁簡得宜在在均有扼要之處實堪久遠遵循現在兵皆足額軍械器具亦俱完整敷用可以有備無患所有廟島一處前因遠夷船隻偶經停泊奉

旨

飭查經設撫江蘭以應否添建砲臺墩汛咨詢該鎮嗣臣抵任後據護理登州鎮移維擬請添建砲臺一座酌撥千總一員帶兵二十名携眷防守並需添建營房五十間茲臣親往閱看該島距登州府城東北六十里延袤十餘里並非海道必經之地向來一切商船前往天津關東貿易間有灣泊廟島避風者若風水順利即經由大洋行走無

須在該處寄碇是此島原非扼要之區若遽行添建砲臺  
抽撥弁兵常年駐守似覺虛設況該島距鎮甚近儘可隨  
時控扼巡哨無庸增設砲臺移駐眷兵徒多糜費惟估修  
砲臺挑選砲手修造戰船酌添哨船等事現已悉心籌畫  
妥協辦理查各海口舊設砲臺共一十九座均能依憑險  
要布置周密且細加履勘所有高寬做法並收貯軍火及  
撥兵守護之處悉臻妥協此內膠州之唐島口古鎮口二  
處砲臺尚屬完固其餘十七座因閱年久遠多有坍塌均  
應及時葺治前經藩司江蘭於護撫任內將各處砲臺墩  
汛奏請動項修理共估需銀六千餘兩茲且樽節覆估  
所有應修砲臺共需銀三千六百九十餘兩現在飭司照  
例造冊到日另行題估一面飭購料物次第修築俾砲  
臺一律整齊以壯聲威其沿海墩汛散在各州縣已飭地

方官隨時粘補無須動項辦理又查砲手一項向來綠營  
陋習每以庸弱兵丁充數與鎗箭之確有憑準者不同臣  
謹飭將備留心挑選以期兵與器習不致有名無實又查  
東省戰船係水師專管三處每處各有戰船四隻逐一  
驗開殊欠堅利竊思一船須得一船之力務期完整穩固  
方可供緝捕而耐風濤今細加體察雖尚無偷減扣剋情  
弊但向遇大小修及拆造之年均歸海防同知一手經辦  
而船上一切蓬索料物須赴江浙採購所有額定正帖銀  
兩亦因時價增昂漸不敷用在承修之員未免涉於遷就  
且同知係佐貳微員亦難任此要務應請照閩浙之例改  
歸登萊青道經管督同水師營將備詳慎辦理所有現在  
戰船即交該道永齡妥速籌辦以專責成其例價未敷  
之數臣與司道等自行公同捐辦以期一律堅實又查東

省哨船向係三月開洋九月迴汛其自十月至次年二月從不駕駛出洋此數月內商船照常往來並無巡哨在彼臣面詢汛員據稱冬今春初海上風力較硬船身笨重難以行駛即平日船隻出入因山東海口天然收窄兼以砂積淤深大船總須候潮而行斷難徑行進口等語查所稟亦係實情但海洋緊要大船既難隨時巡哨而每年十月至次年二月竟無巡哨出洋是詿奸緝盜諸務尚欠周密應請每汛添建小哨船二隻所需工料等項即於現在節省修葺墩汛銀兩內動支造報此項船隻冬春俱令在洋梭巡瞭望可期得力其輪派弁兵查拿盜匪並一舉兩得以上應行籌辦各事臣一面具奏一面即次第辦理至將備之必須親身出洋與弁兵之不准濫竿充數以及定保甲稽查之法除窩頓勾結之弊果能實心辦理海洋自

可益珍盜謚矣

覆奏滇省銅鉛各廠毋庸封閉疏乾隆六十年

福康安

大學士雲貴總督臣福康安謹 奏為遵 旨定議覆

奏仰祈 聖鑒事竊臣等欽奉 上諭御史王城奏

寶泉寶源二局現已減卯雲貴四川湖廣等省亦停止鼓鑄請暫行停減採挖銅鉛以杜私鑄等語雲貴四川等省現在正需籌辦停鑪及收繳小錢各事宜頭緒紛繁若復封閉礦廠地方官何暇常川前往查驗且封廠之後奸民惟利是趨勢必前往採挖是所謂封廠仍屬有名無實況廠徒人數衆多一經封閉此等貧民餬口無資更恐滋生事端王城所奏止知其一不知其二但該御史既有此奏著交與雲貴四川各督撫將所言是否可採或應如何在

於各該廠設法稽查倍加嚴密以防透漏於廠務更為有益一併悉心妥議具奏欽此 臣等跪讀之下仰見我

皇上權衡廠務燭照無遺於

優加軫恤之中仍寓慎

密防閑之至意伏查滇省採辦銅劬以供京外各局鼓鑄之用每歲共需額銅一千餘萬劬均係取資各廠現在京局及各省爐座雖分別減卯停鑄而年額銅劬仍照舊解運採辦蓋因鼓鑄攸關銅劬轉運需時必須廣為儲蓄以資源源接濟竝使預備有餘無俾稍有缺乏是以所開各廠均未便酌議封閉且廠民尋苗覓引跣獲一廠非費本開挖不能成礮獲礮而礮硿窩路均在山腹低陷之中又須隨時修理洩水庶無淹浸若封閉停採失於興修即成廢硿不但已成之廠棄之可惜設將來仍須攻採則提辦廢礮較之開挖新硿更為費力況每廠砂丁不下千計一

一旦失業無歸必致轉而為匪誠如 聖諭此等無業貧民餬口無資更恐滋生事端若酌議安置則人數繁多亦難分派管束查滇省各廠或委員經營或歸地方官承辦其應辦額銅稍有短少即干叅處各該員自願考成自不敢不嚴密稽查以防偷挖走漏一經封閉各地方官轉得卸責而廠徒人等祇知圖利營生必致潛踪私挖不已積久又圖私鑄是欲封廠以杜弊轉足以啟弊端殊非慎重銅政肅清錢法之道臣等與各司道悉心籌議所有滇省各銅廠應請照舊開採毋庸封閉臣等仍督同該管道府並嚴飭各廠員加意整頓實力稽查務期礦旺銅豐依限撥運不使稍有短絀透漏庶廠務悉歸實效而諸弊亦可肅清至滇省黑白鉛廠共止三處每年額辦有定除抽課通商外其餘係供本省局鑄及各營操演鉛彈之用今鼓



鑄雖停而民用所需軍火所資均不便於缺乏且鉛廠沙  
丁攻掠謀生相安已久若一經封閉亦恐廠民失所依歸  
而奸徒轉致偷挖滋事應仍舊辦理其貴州通省鉛廠較  
多體察情形亦與滇省各廠相仿臣福康安已札商撫臣  
馮光熊再加查核妥協會議另行具奏所有滇省鉛銅  
各廠應請毋庸封閉緣由臣等合詞恭摺覆奏

酌籌淮北加運章程疏乾隆六十年 蘇楞額

兩淮鹽政臣蘇楞額謹奏為酌籌淮北加運章程以疏  
積壓恭請 聖諭遵行事竊照淮北各商辦運綱食引  
鹽每年額行十四萬八千四百九十二併引自乾隆五十  
一五十四兩年積引壅滯前鹽政全德屢次奏請統銷之  
後各商復引帶完舊課兼運新鹽辦理竭蹶於乾隆五十  
七年經署鹽政奇豐額奏明將壬子一綱未運引鹽全

行請統其錢糧分為十綱帶完經部覆准奉 旨允行

仍飭行鹽政以統銷引目商人輸無鹽之課恐日久力疲終非善策嗣後務須體察積滯緣由求正本清源之道以期實運實銷等因欽遵在案臣伏思淮北引鹽屢統屢積誠如部議必須正本清源現在乙卯己屆開綱上綱甲寅又有二萬餘引未經運竣雖比較前數年所積尚少但淮北各商力量單薄若不預籌疏通恐漸積漸多不過三四年必積套一綱之引臣詳加詢問衆商復與運司徹底講求其因何滯運之故蓋緣淮北向來認運共有二十餘商自四十九五十一二等年各岸滯銷灶鹽歉產各商多有消乏每致岸引退懸雖僉商接認無奈旋僉旋乏現在所存僅止十二商其退商所懸之引即派現商帶運是引多商少資力本有不支且淮北場鹽每年須至六月間候重

運糧船過竣鹽開放水之後始能發運出場趕緊於七八  
九十四個月之內全運到淮以備來年陸續捆包赴岸一  
交冬令冰凍即行停止計一年內僅止數月可以運鹽而  
一綱之鹽價運脚均須取給於一時以致商力更形掣肘  
兼之分運安豫兩省口岸寫遠水陸分途經由開壩起剥  
渡湖沿途拋耗運道艱阻水脚亦層層多費現運各商雖  
勉力辦運祇能各完本名應運之引其加派之引難以兼  
顧往往稽延是欲設法疏通必須節省運費俾得轉輸迅  
速方足以清積弊之源臣查康熙二十年題請淮北改  
行併引以二引之鹽合為一包每包例捆七百二十八斤  
原為運道紆折併包易於僭運起見迄今百十餘年久著  
成效惟有推廣併引之意酌以四併引混帶一併引每包  
於額捆斤數之外各加入一百八十三斤共重九百一十

斤加砵秤掣仍不致於累重俾各商請運本名額引時即將加派之引同時併運所有包灑帶之鹽仍按斤合引一同完納錢糧引課俱清並無牽混約計每網以捆十萬餘引全數配運不但捆工包索水脚等費較前均得節省商力借以展舒且新鹽備帶早完殘鹽亦一體接運可冀漸就疏通辦理庶為校實如蒙 俞允即請自本年乙卯網起按包加斤灑帶運銷仍試行三年如果著有成效另容查明 奏請永為定例 臣愚昧之見是否有當伏乞

皇上睿鑒 訓示遵行

皇清奏議卷六十八